

Barɲanii nba ki Jɔɔnn din sɔb nae na

Ki j̄in Jɔɔnn gbouŋ na po

Yennu maan nba ki Jɔɔnn din sɔb na want a Yiisa tee Yennu mɔbɔnn nba yɔɔ be-e, ki “kpant nirɔ ki be nant.” Nan gbouŋ na mɔŋ nba yet na, Jɔɔnn din sɔb barɲanii na, a li karinteeb n teen yada nan Yiisa-e tee tinntɔɔ, Yennu Bija na, ki bi-i teenɔ yada bi sii mɔk manfoor. (20.31)

Ki j̄in wunba tee Yennu mɔb na po

¹ Pinpiik ni dinn ki sɔɔ ki siar daa din kaa na, ɲaan wunba ki bi yiu Yennu Mɔb na ɲarin poŋ din be-e, ki Yennu Mɔb maŋ taa nan Yennu. ɲɔɔe bia tee Yennu. ² Yennu Mɔb maŋe din be nan Yennu sinsinn, ³ ki u nie ki Yennu nan bont kur, ki siar din kaa ki Yennu nan ki li ki nyii u ni, ⁴ ki u nie biak ki manfoor be, ki u jikit teen niib, ki manfoor maŋe teen niib yentu, ⁵ ki yentir bunbɔnn, ki bunbɔnn na ki fit kpeent yentu maŋi.

⁶ Jasɔɔ nna din be ki u sann yi Jɔɔnn, wunba wuur niib Yennu nyunwuru na, ki Yennu tumɔ ⁷ a wun baar ki tan mɔɔnt yentu na po, ki bin gbat ki teen yada. ⁸ ɲaan Jɔɔnn maŋ kaa din tee yentu na. ɲɔɔ kpan din baar a wun bet niib yentu maŋ poe. ⁹ Yiisa-e tee barmɔnii yentu nba din baar tingbouŋ na ni, ki yentir niib kur

ni. ¹⁰ Waa din baar tingbouŋ na ni na, ŋaan tingbouŋ na ŋaateeb lek din ki banno, ŋaan u nie setik ki Yennu din nan tingbouŋ na. ¹¹ Waa din baar tingbouŋ na ni, u din be u tiŋŋ niib Juu teeb nie, ŋaan bi lek din ki gaarɔ. ¹² Ŋaan binba kur gaarɔ ki teenɔ yada, ŋamme ki u chabib yaak ki bi ji teen Yennu waas. ¹³ Yennu nba din turib u manfopaann na paak ki bi teen Yennu waas. Li ki tee nisaarii kaa din turib li manfoor, baa marib yoo nba na, ŋaan li din tee Yennu-e.

¹⁴ Yoo nba ki Yennu Mɔb maŋ din baar ki tee nisaarik na, u din be nant tingbouŋ na ni, ki gbee nan ninbatinu, nan barmɔnii wannu, ki timm nba din be nano na laat u yentsaakar, ki li yentsaakar nyii u Baa Yennu boor, kimaan u tee u Biyemmir.

¹⁵ Yoo nba ki Joonn nba din wuur niib Yennu nyunwuru na tan lau, ki u nyinn u siara ki yikin sanpaapowa a, “Daano nba ki n daan beeri ki yaa u tan saa baar ki cheen, ki poŋ din beewa ki bi tan marin na, ŋooe na jik.”

¹⁶ Tɔn, waa gbee nan ŋant bianjinba na, ki ti kur la u ŋant maŋ, ki bia laat sommir yoo kur. ¹⁷ Moses din turit Yennu sennue, ŋaan Yiisa Masia ŋarin baar nan ninbatinue ki turit, ki bia wannit barmɔnii wannu. ¹⁸ Soɔ ki mi la Yennu; u moŋ biyemmir nba mantik kpiaua ki bia jan nano na, ŋooe fiito ki turit.

Joonn nba din wuur niib Yennu nyunwuru na labaar

(Matuu 3.1-12; Mak 1.1-8; Luk 3.1-18)

19 Tɔn, Juu teeb yudamm nba din be Jerusalem na tun mannteeb yudamm nan Liifai teeb Jöonn boor, a bin boio a, “A tee ηmee?” 20 Ki Jöonn mun ki yêt jiinu, ηaan pak yentib paanu ni a, “Min kaa tee Yennu Niganntɔɔ Masia.” 21 Nanne ki bi boio a, “Ki a tee ηmee? A tee Elaija-ee?” Ki u jiin a, “N ki tee ηɔɔ kaa.” Ki bi bia boio a, “Ki a tee sɔkinii nba nae-e?” Ki u jiin a, “N ki tee ηɔɔ kaa biaki.” 22 Nanne ki bi boio a, “Ki a tee ηmee? Wantit faa tee wunba ki tin ηmat saa bet binba tunt na. A yaa mɔɔ po, a tee ηmee?” 23 Ki Jöonn yaa:

“Mine tee kunkɔr nba be muuk ni, ki hoot na a: Teent Yennu baaru siir.”

Jöonn din jii Yennu sɔkinii Aisaya gbouɔ ni maame, ki pak na ki wann waa tee wunba.

24 Tɔn, niib maɔ din nyii Farisiinba* boor nie. 25 Bi bia din boi Jöonn a, “Li-i tee ki a ki tee Masia, ki bia ki tee Elaija, ki bia mun ki tee Yennu sɔkinii nba na, ki li teen nlee ki a wuur niib Yennu nyunwuru?” 26 Ki Jöonn yaa, “Min ηarin wuur niib nyume, ηaan sɔɔ be i sinsuuk ni na ki i ki miu. 27 Nɔɔe tee wunba yaa wun wei n poor, ηaan n ki jaɔ nan ki n lot u taasaɔmii gbaa.”

28 Tɔn, bi din boio buboit na doo nba sann yi Betani, ki be Jɔɔdann mɔk-pootir na nie. Leɔe ki Jöonn din wuur niib Yennu nyunwuru.

Biaɔinba ki Jöonn yaa Yiisa tee Yennu maruɔ pegann

29 Laa yent sanyiok, ki Jöonn maɔ la Yiisa ki u baat, ki u bet niib na a, “Gotir man! Yennu

* 1:24 1.24 Farisiinba nunii din mɔn Moses sennu weiu paak.

maruŋ Peganne na. Njooe saa nyinn tingbouŋ na ŋaateeb biit. ³⁰ Njooe tee daano nba ki n won beeri a u tan saa wei n poor kii tuun Yennu toona, ŋaan bia chee-n na. U poŋ din beewa ki bi tan marin. ³¹ N tuu ki mi a ŋooe na, ŋaan n baar maa n wur niib Yennu nyunwurue, ki lin wann Israel teeb† waa tee wunba.”

³²⁻³³ Ki Jōonn bia yet niib na a, “Maa daan daa ki bann waa tee wunba maŋ, ki Yennu nba tumin a n tan wur niib u nyunwuru na betin a ‘Daano nba ki a tan la ki n Seyeenji siik ki tan toon u paak ki biar be nano, fan bann nan ŋooe tee wunba saa jii n Seyeenji ki wuur niib para.’ Ki n set la Yennu Seyeenji, ki u nyii Yendouŋ ni ki siik, ki naan ŋmann, ki tan toon Yiisa paak ki biar be nano. ³⁴ N set la nna, ki beeri nan ŋooe tee Yennu Bija.”

Ki jiin Yiisa sinsinn poorpoweiteeb po

³⁵ Laa bia yent, ki Jōonn see nan u poorpoweiteeb na banlee, ³⁶ ki tan la Yiisa gaar, ki u yet a, “Gotir maŋ, Yennu maruŋ Pegann nae na.”

³⁷ Jōonn poorpoweiteeb banlee na nba gbat ki Jōonn yet nna maŋ, ki bi nyiko, ŋaan waa Yiisa.

³⁸ Ki Yiisa saa jiant ki la ki bi waau, ki u boib a, “I loon bee?” Ki bi jiin a, “Wanntoo, ti loon ki ti bann faa be siame.” ³⁹ Ki Yiisa yetib a, “Ii waa maŋ ki saa la maa be siaminba.” Li din tee kut munna yooe jayenn, ki bi weiŋ ki saa la waa be siaminba, ki ji biar be nano daar maŋ ni.

⁴⁰ Bi banlee maŋ nba din doŋ gbat Jōonn nba yet linba, ki waa Yiisa na, bi yenoŋe din tee Andru,

† **1:31** 1.31 Juu teeb sanleere tee Israel teeb.

wunba tee Simonn Piita waarɔ na. ⁴¹ Waa din nyii Yiisa boor na poorpoe, ki u saan yiama ki saa lon u yɔɔɔ Simonn maŋ boor, ki betɔ a, “Ti la Masia nawa,” (ki Masia paak tee Yennu Niganntɔɔ,) ⁴² ŋaan baar nano Yiisa boor. Ki Yiisa gotɔ sirrr, ki tan betɔ a, “Fine tee Simonn, wunba tee Joonn bija, ŋaan a sann bia sii yi Siifas-e.” (Siifas nan Piita tee yomme, ki li paak tee tann.)

⁴³ Li sanyafannuko ki Yiisa loon wun saan Galilii, ki la Filip ki betɔ a, “Ti waa-n.” ⁴⁴ Filip din nyii Bef-saida-e. Leŋe tee doo nba ki Andru nan Piita mun din nyii na. ⁴⁵ Ki Filip mun saan ki saa lon Natanael boor ki betɔ a, “Ti la wunba ki Moses din sɔb u po Yennu sennu gbouŋ ni, ki sokiniinba bia din sɔb u po, ki pak a u saa baar na. Njɔɔe tee Yiisa, wunba tee Joosef bija, ki nyii Nasaref na.” ⁴⁶ Ki Natanael yetɔ a, “Nasaref-ii? Bonŋann saa fit nyi Nasaref-aa?” Ki Filip betɔ a, “A mɔŋ mɔŋ n mun baar ki tan got.”

⁴⁷ Yiisa nba la Natanael baat u peŋ na, ki u pak u po a, “Israel nimɔnɔe na, kimaan u tee burchimɔe.” ⁴⁸ Ki Natanael boiɔ a, “A teen nlee ki mimi?”

Ki Yiisa jiin a, “Filip nba daa bo ki baar ki yiina na, ŋaan sɔɔ ki n poŋ la-awa, ki a kar kinkan nyakir.” ⁴⁹ Ki Natanael yetɔ a, “Wanntɔɔ, a tee Yennu Bijae, ki bia tee Israel teeb kpanbar.” ⁵⁰ Ki Yiisa boiɔ a, “Maa yet a n la-a ki a kar kinkan nyakir nae, ki a teenin yada-a? ŋaan a sii laat toonjaana ki lin gar linba na paak. ⁵¹ Barmɔniie ki n beeri na, i saa la sanpaapo loot, ki Yennu

malakanba siik Nisaarik Bik na paak, ki ηmat do sanpaapo.”

2

Poochiann nba din be Keena na po

¹ Li daa ηantaa daar, ki poochiann be doo nba sann tee Keena, ki be Galilii yent ni na. Ki Yiisa naa saan lej. ² Bi din poi Yiisa nan u poorpoweiteeb, a bin baar. ³ Tɔn, ki tilɔɔna daan nba ki bi din nyu na tan gbenn. Ki Yiisa naa baar ki bet Yiisa a, “Poochiann daan na gbenna.” ⁴ Ki Yiisa betɔ a, “N naa, li la-a lee? N yoo daa ki baari.” ⁵ Nanne ki u naa maη bet toontunna na a, “Linba ki u beti a i tun, yin tun nna.”

⁶ Tɔn, ki bui ηanloob see lej, linba ki Juu teeb tuu tee nyun ki fini nit, nan bi jiantu nba tee bianinba na. Li bui din fit koo nyun galint nan piinlee-lee koo piintaa-taa nawa. ⁷ Ki Yiisa bet toontunna na a, “Gbeent bui na nyun.” Ki bi gbeen nan mɔgbanawa. ⁸ Ki u ji betib a, “Durin nyun maη, ki saan tur jaamm na saakoo.” Ki bi jii saan turɔ. ⁹ Ki u gaar nyun nba poη kpant daama na ki lemm, ηaan u din ki mi daan na nba nyii siami, ηaan toontunna nba dur nyun bui ni na ηarin din mi. Nanne ki saakoo na yiin poo na sɔɔ ¹⁰ ki yetɔ a, “Soo kur tuu tor damamm sinsinnewa. Li-i tee ki bi nyuu saama, wun ji tor linba ki man fanu na, ηaan ki yimm ηarin ηmina, ki ji tan joont toor daan nba man ki gar siar kur na.”

¹¹ Tɔn, Yiisa nba din tun toonjaann maη Keena nba be Galilii yent ni na, ηanne din tee u sinsinn

toonjaann, ki li wann niib waa mək Yennu yiikoo bianjinba; ki u poorpoweiteeb na teeno yada. ¹² Li poorpo ki Yiisa nan u naa nan u waarii nan u poorpoweiteeb na saan Kapenaum, ki saa be lej daa njanlee nna.

Yiisa nba namm Yenjiantu nasaakak bianjinba (Matuu 21.12-13; Mak 11.15-17; Luk 19.45-46)

¹³ Nanne ki Juu teeb yukitgar* tiaru jaamm tan per, ki Yiisa saan Jerusalem, a wun saa di jaamm man. ¹⁴ Waa baar Jerusalem yoo nba, ki u koo Yenjiantu nasaakak na ni, ki la jab ki bi koi nei nan pei nan nmana, ki bia la lik-kpenta ki bi kar kpentir likirii. ¹⁵ Ki u jii nmiit ki pian kpaasir, ki ber bonkobit na kur, ki nyinnib Yenjiantu nasaakak man ni, njan tut tut lik-kpenta teebula na ki lu, ki likirii na baa yat; ¹⁶ njan bia bet binba koi nmana na a bin nyinn nmana man, ki bia yetib a, "I daa tee n Baa njaak kpinkpouj boori." ¹⁷ Li yoo na ki u poorpoweiteeb na ji tiar Yennu gbouj nba yet bianjinba na a, "N numm mon n Baa jiantu nasaakak na paak bonchiann."

¹⁸ Nanne ki Juu teeb yudamm na boi Yiisa a, "A saa tun nyinlannpoe ki wannit nan a mək yiikooe ki tun linba na?" ¹⁹ Ki Yiisa jii a, "Ton, yii yeer Yenjiantu diiuk na, njan n saa jii daa nantaae ki maar." ²⁰ Ki bi yet a, "Waa! Bi jii bina piinna nan njanloobo ki maa Yenjiantu nasaakak na, njan ki fin tan yaa a saa jii daa nantaa kuukooe ki maa." ²¹ Yennu diiuk nba ki Yiisa din pak na tee u mon gbanante. ²² Yennu nba din fiino kuun

* **2:13** 2.13 Yennu malakae din kpil Ijpt teeb bijakpera njan nyik Israel yab. (Nyinuu 12.29)

ni na poorpoe, ki u poorpoweiteeb tiar linba ki u daan yet na, ki ji teen Yennu gbouŋ nba want Yiisa kuunfiiru po na yada, ki bia teen Yiisa maan na yada.

Yiisa nba mi sɔɔ kur dudukit bianjinba

²³ Yukitgar tiaru jaamm na yooe ki Yiisa din be Jerusalem, ki tuun bakitnaun toona, ki niib bonchiann la ki teenɔ yada, ²⁴ ŋaan Yiisa din ki jii u mɔŋ ki chabibi, kimaan u mi sɔɔ kur nba tee wunba. ²⁵ U din mi niib dudukit bonŋann. Li paak, li din ki kpaa talas ki sɔɔ n wannɔ nisaarik binbenji.

3

Ki jiiŋ Yiisa nan Nikodemus po

¹ Joɔ nna din be ki u sann tee Nikodemus. U din tee Juu teeb yudaanɔe, ki bia tee Farisii niro; ² ki nyɔsiɔk ki u tan baar Yiisa boor, ki yetɔ a, “Chanbaa, ti mi nan a tee wantɔɔ nba nyii Yennu boore, kimaan sɔɔ kan fit tun toonjaana nba ki a tuun na booru, ki li ki tee Yennu be nanɔ.”

³ Ki Yiisa betɔ a, “Barmɔniie ki n beera na, sɔɔ kan fit kɔɔ Yennu naan ni, bi-i kii ŋamm marɔ-i kaa.” ⁴ Ki Nikodemus boiɔ a, “Nlee ki bi saa ŋamm mar niro nba ki tee biki? Kimaan u ji kan fit ŋmat kɔɔ u naa poor ni, ki wun marɔ.” ⁵ Ki Yiisa yetɔ a, “Barmɔniie ki n beera na, sɔɔ kan fit kɔɔ Yennu naan ni, see ki u la maaru munlee, ki li tee Yennu Seyeeŋ nan Yennu nyunwuru yar. ⁶ Nisaarik ŋarin maar nisaarike, ŋaan ki Seyeeŋ na mun maar Seyeeŋ yooe. ⁷ Li paak, a daa te ki

li teea bakitnaun nan maa yaa ‘See ki bi namm mari na.’ ⁸ Woun da ki saa laa loon siaminbae, ki a ki mi laa nyi sian ki da. A bia ki mi laa saa siami, naan a gbia ki li dae. Li mun bia tee nnae ki tur soo kur nba ki Yennu Seyeen* maro.”

⁹ Ki Nikodemus boio a, “Nlee ki li saa teen nna?” ¹⁰ Ki Yiisa jiino a, “A tee daano nba want Israel teeb† Yennu maame, naan tan ki mi linba na paaki-i? ¹¹ Barmoniie ki n beera na, ti beeri linba ki ti mi, nan taa bia la linbae, naan ki i ki gaan ti maami. ¹² Li-i tee ki i ki teenin yada, nan maa beeri tingboun na bona po na, li-i tee ki n beti Yendoun ni bona po, nlee ki i ji saa teenin yada? ¹³ Soo kaa ki mi doo Yendoun ni see min Nisaarik Bik nba nyii Yendoun ni na.”

¹⁴ Moses nba din jii kut waauk ki fin daauk paak ki donno muuk ni bianinba na, li mun bia tee nnae ki bi tan saa jii Nisaarik Bik ki donno sanpaapo, ¹⁵ ki wunba teeno yada, u saa la manfoor nba kaa gbennu. ¹⁶ Kimaan Yennu mantik loon tingboun na bonchiann; li paak, ki u turit u Biyemmir, ki wunba teen u Bija man yada, u tan kan koo muu ni, naan u sii mok manfoor nba kaa gbennue, ¹⁷ kimaan Yennu nba din tun u Bija tingboun na ni, u din ki tumo a wun tan bu tingboun na niib buut ki biirib kaa, naan u din yaa wun tinnibe. ¹⁸ Ki daano nba teen Yennu Bija man yada, Yennu kan bu u buut ki biiro, naan wunba ki teeno yada, Yennu pon bu u yaa

* **3:8** 3.8 Bi maan ni, “woun” nan “seek” mabona tee yomme.

† **3:10** 3.10 Juu teeb sanleere tee Israel teeb.

buut ki biirōwa, kimaan waa ki teen ηōō Yennu Biyemmir maŋ yada na.

¹⁹ Linba paak te ki Yennu bu bi buut ki biirib maŋ tee nnae: Yennu Bija na din baar tingbouŋ na ni a wun yent tingbouŋ na niib numpoe, ŋaan ki nisaarii loon bunbōnn ki gar yentu, kimaan bi toona nba bi bianjinba na paak. ²⁰ Daano nba kur tuun toonbiit, u ki loon yentue, ki ki loon wuu nakiir, kimaan u ki loon u toonbiit na n nyi paanu. ²¹ Ŋaan wunba waa Yennu barmōnii wannu na ki bia tuun li bian, ηōōe baat yentu boor, a sōō kur n bann nan Yennu be u toona kur ni.

Jōonn nba want Yiisa po bianjinba

²² Li poorpoe ki Yiisa nan u poorpoweiteeb din nyii leŋ ki saan Judea yent ni, ki saa be leŋ nan daa ŋanŋaa na, ki wuur niib Yennu nyunwuru.

²³⁻²⁴ Li yoo na ki sōō Jōonn nba wuur niib Yennu nyunwuru na daa ki kōō dansariki, ki be Enonn, siaminba ki nyun din yab na, ki niib din tuu baat u boor, ki u wuurib Yennu nyunwuru. Enonn din ki fōk nan Salim-i.

²⁵ Ŋanne ki mōniok tan fiir Jōonn maŋ poorpoweiteeb nan Juu nirō nna sinsuuk ni, ki jiin Yenjiantu nyunwuuru po. ²⁶ Ki Jōonn poorpoweiteeb na saan u boor, ki saa betō a, “Chanbaa, nirō nba ki a daan be nano Jōodann mōk-pootir, ki yaa u tee Yennu Niganntōō na, ti gbat ki u wuur niib Yennu nyunwuru, ki sōō kur saa u boor ki u wuurib.” ²⁷ Ki Jōonn betib a, “Nirō kan fit tun siar ki li ki tee Yennu nyinnō. ²⁸ I mōŋ poŋ mi gbat ki n yet maa min kaa tee Yennu Niganntōō Masia, ŋaan min ŋarin, Yennu dōŋ

tumime, a n tan teen u baaru siir. ²⁹ Poosoro tee wunba yen pooyookir. Wunba tee poosoro na yook, ki be u boor ki gbiin na, hooe mok parpeenn, yoo nba ki u gbat poosoro na kunkor. Nnae ki n mun set mok parpeenn bonchiann Masia paak.

³⁰ “Li kpaal talas hoo Masia sann-ii yabitir, haaan ki n sann-ii waabit.”

Wunba nyii Yendoun ni labaar

³¹ Wunba nyii sanpaapo, hooe chee soo kur; haaan binba nyii tingboun na ni, hamma tee tingboun na teebe, ki bia piak nisaarii maan. Wunba nyii Yendoun ni, hooe chee soo kur, ³² ki bia jenna ki beer niib linba ki u la ki bia gbat, haaan soo ki gaan u maami. ³³ Ki wunba gaar u maan man, li want nan hooe sak nan Yennu maan tee barmonii. ³⁴ Yennu Bija nba ki u tumo na piak Yennu maame, kimaan Yennu tur u Bija man Seyeen nba yab ki kaa bikinu. ³⁵ Yennu loon u Bija, ki kubin bona kur u nuu ni.

³⁶ Daano nba teen Yennu Bija yada, u sii mok manfoor nba kaa gbennu, ki daano nba mun ki saak Yennu Bija na mob kan la manfoor manji, haaan Yennu wutoor saa do u paak ki kan maaki.

4

Samaria poosoo labaar

¹ Ton, ki Farisiinba din gbat a Yiisa daak niib ki wuurib Yennu nyunwuru ki bi tee u poorpoweiteeb, ki yab gar Joonn yab. ² Barmonii narime, Yiisa din ki wur soo u monji, haaan u poorpoweiteebe din wuurib. ³ Yiisa nba bann

nan Farisiinba na gbat nna man, ki u nyii Judea yent ni ki nmat saa Galilii yent ni. ⁴ Ki u sonu man ni, ki li tee talas turɔ nan wun gar Samaria yent ni. ⁵⁻⁶ Ki yonsuuk ni, waa din tan per Samaria teeb digbansiar ki bi yir Saika, ki u baar Jakob bunbunn boor. Len din ki fok nan kpaab nba ki Jakob tur u bik Joosef na.

Waa din baar bunbunn na boor, ki bakint ji sooro, kimaan sommir na paak, ki u biar kar bunbunn na nyakir. ⁷ Nanne ki Samaria poosoɔ tan baar bunbunn man boor, a wun luun nyun. Ki Yiisa yeto a, “Turimin nyun ki n nyu.” ⁸ Li yoo na ki soɔ ki u poorpoweiteeb pon saan doo niwa, a bin saa daa jeet, naan ki u biar u kuukoɔ. ⁹ Juu teeb na din tuu siɲ Samaria teebe, ki ki loon bii taant nammi. Li paak, ki poo na boio a, “A tee Juu nirɔe, ki n mun tee Samaria poo, ki li teen nlewa ki a tan mein nyumi?” ¹⁰ Ki Yiisa jiino a, “Li-i tee ki a bo mi bakitnaun piinii nba ki Yennu loon wun pia na, ki bia mi maa tee wunba ki meia nyun na, a bo saa boin a n tura manfoor nyun, ki n set bo saa turawa.”

¹¹ Ki poo na yeto a, “Chanbaa, bunbunn na sumii hei, ki a mun bia ki mok gooka. Lee ki a saa luun manfoor nyun manji? ¹² Ti yeeja Jakob-e din lukir bunbunn na, ki nɔɔ nan u waas nan u bonkobit kur nyu len. A dukii nan a gar Jakob-a koo?”

¹³ Ki Yiisa yeto a, “Wunba nyuu bunbunn na nyun, nyunnyukuru tan saa namm sooroɔwa, ¹⁴ naan mi-i tur wunba n nyun na ki u nyuu, nyunnyukuru kan mi sooro, kimaan mi-i tur wunba n nyun na, li sii bunii manfoor nyume

u ni, ki bia turo manfoor nba kaa gbennu.” ¹⁵ Ki poo na yeto a, “Chanbaa, turimin li nyun, ki nyunnyukuru ji daa mi somi, ki n bia ji daa mi ki baat nna ki tan lu nyumi.”

¹⁶ Ki Yiisa beto a, “Ii saa ki yiin a soro ki jen nana na.” ¹⁷ Ki u beto a, “N ki mok soro.”

Ki Yiisa jiino a, “Faa yaa a ki mok soro na, nann a mok monii, ¹⁸ kimaan a pon kun jab banjmuwa, ki joo nba ki a daa be nana motana na ki tee a soro kaa. A set pak moniie.”

¹⁹ Ki poo na yeto a, “Chanbaa, n ji bann nan a tee Yennu sokiniie. ²⁰ Timm Samaria teeb yeejamm din jiantir Yennu, kunkonn na paake, njan ki yimm Juu teeb narin yaa Jerusalem-e tee siaminba nan Yenjiantu.”

²¹ Ki Yiisa beto a, “N niipoo, teent n maan yada, yoo baat ki niib tan kii jiantir ti Baa Yennu kunkonn na paaki, ki bia tan kii jiantiro Jerusalem-i. ²² Yimm Samaria teeb ki mi yaa jiantir wunba, njan timm Juu teeb narin mi taa jiantir wunba, kimaan tinnu labaar nyii Juu teeb nie. ²³ Njan yoo baat, ki pon set baara, ki binba jiantir ti Baa Yennu nan barmonii na sii jiantiro u Seyeen pan nie ki mi waa tee wunba, kimaan li niboore ki Yennu loon bii jiantiro nna. ²⁴ Yennu tee Seeke, ki binba jiantiro na, li kpaalalase bii jiantiro nan barmonii, u Seyeen pan ni.”

²⁵ Ki poo na yeto a, “N mi nan Masia nba ki bi yiu Yennu niganntoo na tan saa baara. U-u tanj baar yoo nba, u saa betit barii kura.” ²⁶ Ki Yiisa jiino a, “Mine na, min nba piak nana na.”

²⁷ Li yoo mane ki Yiisa poorpoweiteeb jen, ki li teemm bakitnauj nan Yiisa nba piak nan poo

na, ɲaan bi soɔ ki boi poo na a u loon bee, ki bia ki boi Yiisa a bee ki u piak nano.

²⁸ ɲanne ki poo na nyik u nyunsoor na, ɲaan ɲmat saan doo na ni, ki saa yet niib a ²⁹ “Baat man, ki tan got joo nba betin bonsiar kur nba ki n poŋ mi tun. I dukii nan ɲooe tee Yennu Niganntoo Masia na-a?” ³⁰ Baa gbat nna yoo nba, ki bi nyii doo na ni ki saan Yiisa peŋ.

³¹ Li yoo maŋ, ki Yiisa poorpoweiteeb barimo, ki yeen a, “Wanntoo, dimin jeet.” ³² Ki Yiisa jiiimm a, “Min mok jeet nba ki n saa di, ɲaan ki i ki mi li po.” ³³ Ki u poorpoweiteeb na ji boi bi leeb a, “A mi soɔ tan sii turo jeeti-i?” ³⁴ Ki Yiisa jiiimm a, “Min yaa jeet tee man sak Yennu nba tumin na mobe, ki tun u yanbootoona ki gbenn.

Dijaamu barjouk

³⁵ “I tuu yaa li tenn ɲmaarii ɲannaen nan bin jaan dii. ɲaan n beerie, gotir kpaant man, jeet na poŋ teen siir nan jaamuwa. ³⁶ Ki dijaara tan saa gaar bi paauk, ki dii nba ki bi jaan na mun, ɲamme tee niib nba tan saa la manfoor nba kaa gbennu, ki damm nba buur nan binba jaan, bi kur tan sii mok parpeenn dii maŋ paak. ³⁷ Ti mok barjouk a, ‘Yenoe buur, ki loo jaan,’ ki li set tee monii. ³⁸ N te ki i jaan siaminba ki i ki kooe. Siabe poŋ koowa, ki bi konu maŋ sommi ki i la dii.”

³⁹ ɲanne ki Samaria doo ni niib bonchiann gbat poo na nba beerib a, “Yiisa betin bonsiar kur nba ki n poŋ mi tun,” ki bi teen Yiisa yada, ⁴⁰ ki saan bunbunn na boor Yiisa peŋ, ki barimo a wun biar kii be namm. Ki u sak ki biar be

namm daa njanlee, ⁴¹ ki piak u maan ki teemm. Baa din gbat nna, ki bi bonchiann teeno yada. ⁴² Li yoo na ki bi ji bet poo na a, “Taa teeno yada motana na, li ki tee faa betit u po na kuukoo kaa, njaan taa gbat u mon mob ni na paak ki ti teeno yada, ki bann nan nooe set tee tingboun na Tinntoo.”

Yiisa nba din te ki yudaansoo bija la laafia bianjinba

(Matu 8.5-13; Luk 7.1-10)

⁴³ Li daa njanlee poorpoe ki Yiisa nyii len ki saan Galilii yent ni, ⁴⁴ kimaan u mon pon yet a, “Yennu sokinii kan la baakir u mon doo ni.” ⁴⁵ Njaan waa baar Galilii yoo nba, ki niib na gaaro, kimaan baa daan saan yukitgar tiaru jaamm Jerusalem na, bi daan la linba kur ki u tun Jerusalem, jaamm yoo nawa.

⁴⁶ Waa din lin Galilii yent ni na, ki u saan Keena, siaminba ki u din te ki nyun kpant tilona daan na.

Ki yudaansoo din be Kapenaum, ki u bija yiar. ⁴⁷ Ki u gbat a Yiisa nyii Judea ki baar Galilii yent ni. Ki u baar u pen, ki barimo a wun baar Kapenaum, ki te ki u bija n la laafia, kimaan u yaa wun kpoe. ⁴⁸ Ki Yiisa beto a, “Li-i tee ki i ki la nyina nan bakitnaun toonjaana, i kan teenin yada.” ⁴⁹ Ki yudaano na jiin a, “Chanbaa, njaant tin saan, ki n bik man daa ki kpo na.” ⁵⁰ Ki Yiisa beto a, “Ti kun. A bija na la laafiawa.”

Nanne ki yudaano na teen yada nan Yiisa nba pako linba man, ki ji nmat kun. ⁵¹ U be sonu nie ki u toontunna cheto nan labaar a, “A bik na la

laafiawa.” ⁵² Ki u boib a, “Nlee yooe ki bik man la laafia?”

Ki bi yeto a, “Wonn, kut youn yenlekire ki u gbanu won maak.” ⁵³ Ki joo na tiar nan li yooe ki Yiisa won beto a, “A bija na la laafiawa na.” Li paak ki joo nan u naateeb kura teen Yiisa yada.

⁵⁴ Yiisa nba din tun toonjaann man na, li din tee toonjaann nba ki u tun pukin nanlee-e, yoo nba ki u nyii Judea yent ni ki baar Galilii yent ni na.

5

Yiisa nba te ki baatoo la laafia bianjinba

¹ Li poorpoe ki Juu teeb jaansiar tan baar, ki Yiisa saan Jerusalem. ² Leŋe ki kukintuk doo nan nyun, ki lanbont nanŋmu chaan lintu, ki Juu teeb maan ni, ki bi yir Bef-sata, ki li kpia pei tammob na. ³ Baatib bonchiann din tuu doo leŋ, ki siab tee joonii, ki siab tee dianii, ki siab mun tee gbanankpeena damm. ((Bi tuu doo ki guu nyun na dammue. ⁴ Yosau Yennu malakasoo tuu sike ki damm nyun man. Yoo nba ki u damm nyun na, ki baatoo nba sint sik li ni, u yiaru tuu gbenne.))

⁵ Ton, jasoo din be leŋ, ki yiar bina piintaa nan nanniin. ⁶ Ki Yiisa tan baar la ki u doo leŋ, ki u bann nan joo man yiaru yukira, ki u boio a, “A loon ki a la laafia-a?” ⁷ Ki baatoo na jiin a, “Chanbaa, nyun na-i damm yoo nba, n ki mok wunba saa jiin ki sikinin li ni. Ki mi-i yaa n sik, soo tuu don sike, naan nyikin.” ⁸ Ki Yiisa beto a, “Fiit, ki jii a doonu kii somm.” ⁹ Li taakpaak ni ki joo na la laafia, ki fiir ki jii u doonu ki ji somm.

Daar nba ki joo na la laafia na din tee foon daare. ¹⁰ Li paake teen ki Juu teeb yudamm din beto a, "Dinna tee foon daare. Ti sennu ki chab nan fan jii a doonu kii somm nanni." ¹¹ Ki u jiin a, "Joo nba te ki n la laafia na, hooe yetin a n jii n doonu kii saa nann." ¹² Ki bi boio a, "Jalanopoe yeta a a jii a doonu kii saa nanni?" ¹³ Naan joo na din ki mi wunba te ki u la laafia, kimaan Yiisa ji din nyii leja, niib bonchiann nba din tikir na paak.

¹⁴ Li poorpoe ki Yiisa tan lau Yenjiantu nasaakak ni, ki beto a, "Gotir, a la laafiawa, naan a ji daa mi tuun toonbiiti, ki bonbisiar tan saa baara ki gar na."

¹⁵ Yiisa nba pak nan joo na ki gbenn yoo nba, ki joo na nyii ki saan Juu teeb yudamm na boor ki saa betib a, "Yiisa-e te ki n la laafia." ¹⁶ Ki yudamm man ji piin Yiisa mukisuk, kimaan waa te ki joo na la laafia foon daar na.

¹⁷ Ki Yiisa betib a, "N Baa Yennu yoo tuume, ki n mun tuun nnae." ¹⁸ Yiisa nba yet nna yoo nba, ki Juu teeb man namm loon bin kpiu ki gar sinsinn na, kimaan li ki tee waa biir foon daar sennu na kuukoo paak kaa, naan waa bia yaa Yennu tee u Baa, ki yek u mon nan Yennu na paak.

Yiisa nba mok yikoo bianjinba

¹⁹ Nanne ki Yiisa betib a, "Barmoniie ki n beeri na, min Yennu Bija laat n Baa Yennu nba tuun linbae ki mun tuun. N kan fit tun siar nan n mon yikoo. N Baa man nba tuun linba, n mun tuun nanne, ²⁰ kimaan n Baa man loonin, maa

tee u Bija na, ki u wantin linba kur ki u moŋ moŋ tuun. Ki bia jenna, u saa wannin toonjaana mii tuun, ki lin gar linba na, ki li saa teeni bakitnaun. ²¹ N Baa nba fiint kpeemm ki teemm manfoa bianjinba na, nnae mun, ki min nba tee u Bija na mun saa tur binba ki n gann na manfoa.

²² “N Baa ki bu soo buuti, ŋaan u chab min, u Bijae, a mii bu niib buut, ²³ a ki soo kur-ii teenin baakir nan baa teen n Baa Yennu baakir bianjinba na. Wunba ki teenin baakir, li want nan u ki teen n Baa Yennu nba tumin na baakiri.

²⁴ “Barmoniie ki n beeri na, daano nba gbat n maan na, ki bia teen wunba tumin na yada, ŋooe moƙ manfoor nba kaa gbennu; ki Yennu kan bu u buut ki biiro. U bia poŋ nyii kuun nuu niwa, ki be manfoor maŋ nie.

²⁵ “Barmoniie ki n beeri na, yoo baat, ki poŋ baara, ki kpeemm tan saa gbat min Yennu Bija kunkor, ki binba gbat n kunkor maŋ saa la manfoor nba kaa gbennu. ²⁶ N Baa nba yen manfoor ki teen niib na, nnae mun ki u te ki min u Bija mun yen manfoor ki teen niib, ²⁷ ki u bia turin yikoo a mii bu niib buut, kimaan n tee Nisaarik Bike. ²⁸ I daa te ki li tee jaarlituku. Yoo baat ki niib nba kur poŋ kpowa na tan saa gbat n kunkor, ²⁹ ki fiir kuun ni; ki binba tun bonŋann tan saa fiir ki be bi manfoa nba ki moƙ gbennu na ni, ki binba mun tun toonbiit na tan saa fiir, ki n bu bi buut ki biirib.

³⁰ “N kan fit tun siar nan n moŋ yikoo. Mi-i bu niro buut bianjinba, Yennu-e tuu betin a n bu nna. Li paak teen ki n buut took, kimaan n ki

loon ki n tun n moŋ yanbootoona kaa, ŋaan n tuun Yennu nba tumin na yanbootoonae.

Ki jün binba tee Yiisa siara na po

³¹ “N pinpauk na-i want maa tee wunbaie, ŋann niib kan gaar n tiŋ maan maŋi. ³² Ŋaan sooe bewa ki piak linba want niib maa tee wunba. Ŋooe tee Yennu; ki n mi nan waa piak linba n po maŋ na tee barmoniie.

³³ “Tɔn, i tun i niib Joonn nba daan wuur niib Yennu nyunwuru na boor, a yin gbiint u maan, ki waa daan piak linba ki teen niib n po na, li tee barmoniie. ³⁴ Li ki kpaa talas kaa nan niro n pak n po, ŋaan n beeri linba na a yin la tinnue. ³⁵ Joonn maŋ daan tee nan fitir nba ki bi tuu joo, ki li yentu nyokit nae, ki i daan jii yoo waamina ki nian u yentu maŋ.

³⁶ “Bakitnaun toonjaana nba ki n tuun na, ŋanne want n siara ki chee Joonn siara na. Ki bia jenna, toonjaana nba ki n tuun na, n Baae yaa mii tuun, ki toona maŋ tee siara nan n Baa Yennu-e tumin.

³⁷ “Ki bia jenna, n Baa Yennu nba tumin nae mun tee n siara. I ki mi gbat u kunkori, ki bia ki mi lau nan i ninbina. ³⁸ Ki u tumin i boor, ŋaan ki i ki teenin yada; ŋanne want nan u maan kaa i para ni.

³⁹ “Tɔn, i tuu karin Yennu gbouŋ, kimaan i mi nan i saa la manfoor nba kaa gbennu leje, ki Yennu gbouŋ maŋ want n poe, ⁴⁰ ŋaan ki i lek yêt yin baar n peŋ ki n turi manfoor maŋ.

⁴¹ “N ki loon dontir nisaarii boor. ⁴² N poŋ mi nan i ki loon Yennu i yan ni faba. ⁴³ N baar n

Baa Yennu sann nie, ki i ki gaarimi. Naaan li-i tee ki soo baar u moŋ sann ni, i tuu gaaroe. ⁴⁴ I loon ki yii laat dontir i leeb boor, naan ki fiin nan ki i la dontir ɲoo Yennu nba tee Yen-yemmir na boori. Li paak mune te ki i set kan fit teenin yada. ⁴⁵ I daa dukii nan n saa pak maan ki biiri n Baa Yennu boori. Daano nba saa pak biiri, ɲooe tee Moses nba ki i teeno yada na. ⁴⁶ I-i setiki bonni teen Moses sobu na yada, i bo saa teenin yadawa mun, kimaan u din sob ki jiin n poe. ⁴⁷ Naaan yaa ki teen waa sob linba maŋ yada na, nlee ki i ji saa teen n moomaan na yada?"

6

*Yiisa nba dinn jab tusaa ɲanɲmu bianɲinba
(Matiu 14.13-21; Mak 6.30-44; Luk 9.10-17)*

¹ Li poorpo ki Yiisa poot Galilii moŋgbenɲir nba ki bi bia yi Taiberias na. ² Ki nibur waa u poor po, kimaan bi din la u bakitnaunɲ toonjaana nba ki u tuun ki te ki baatib laat laafia na. ³ Ki ɲoo nan u poorpoweiteeb doo kunkonn paak ki saa kar. ⁴ Li yoo ki soo Juu teeb yukitgar tiaru jaamm pera. ⁵ Yiisa nba din kar maŋ na, ki u tan la ki nibur baat u penɲ. Ki u boi Filip a, "Ti saa la jeet lee ki daa, ki dinn niib na kuri?" ⁶ U din boi nna maŋ ki loon wun bikin Filip-e, naan ɲoo ɲarin poŋ din mi waa saa tun linba. ⁷ Ki Filip jiin a, "Ti-i yaa ti daa boroboro ki tur niib na, li saa gar salimpeena* kobii ɲanleewa, ki soo kur n fit la waan." ⁸ Ki u poorpoweiteeb na yeno nba ki bi yiu Andru, ki u tee Simonn Piita waaroo na, yet

* **6:7** 6.7 Salimpeenn din tee daar paauko.

Yiisa a ⁹ “Bisiake be nna ki mək boroboro kunbis ɲanɲmu nan janbis ɲanlee. Ɗaan li mun kan jaɲ niib na kuri.”

¹⁰ Ki Yiisa betib a, “Ɗaant man ki niib maɲ n kar.” Mɔpaauɲ bonchiann din be leɲ, ki bi kar, ki jab tee tusaa ɲanɲmu. ¹¹ Ki Yiisa jii boroboro na, ki tur Yennu niipoouk, ɲaan te ki bi tor niib nba kar maɲ; ki u bia jii janii na ki teen nna, ki bi kura dii ki saa jaɲ baa loon bianɲinba. ¹² Baa gboo yoo nba, ki u yet u poorpoweiteeb na a bin tikir jeet nba tenn na, ki li daa biiri. ¹³ Ki bi tikir baa dii boroboro kunbis ɲanɲmu na ɲaan tenn linba na, ki li gbee kpanchibit piik nan ɲanlee.

¹⁴ Niib maɲ nba la bakitnaun toonjaann nba ki Yiisa tun na, ki bi yet a, “Barmɔniie setik, nirɔ nae tee Yennu sɔkinii nba yaa wun baar tingbouɲ na ni na.” ¹⁵ Ki Yiisa ji bann nan bi yaa bin soorɔ ki dinnɔ naame. Li paake te ki u din nyikib ɲaan ɲmat kunkona boor, ki saa be u kuukɔɔ.

*Yiisa nba din somm nyun paak bianɲinba
(Matiu 14.22-33; Mak 6.45-52)*

¹⁶ Daajoouk nba tan baar, ki Yiisa poorpoweiteeb sik məkɲbenɲir na ni, ¹⁷ ki saan kɔɔ burgbetir ki kan saa a bin poot məkɲbenɲir na, ki took Kapenaum. Ki li din tan bɔnn, ki sɔɔ Yiisa daa ki baar bi boori. ¹⁸ Ki wonpaaruk tan fikit ki da nyun na paak. ¹⁹ Yoo nba ki u poorpoweiteeb kan saan nan maar ɲantaa koo ɲanna na, ki bi la Yiisa somm nyun na paak ki tookit burgbetir maɲ, ki jaɲmaanii ji soorib. ²⁰ Ki Yiisa betib a, “I daa tiin jaɲmaanii mani. Li tee mine.”

²¹ Baa bann nan Yiisa-e na, ki bi ji mək parpeenn nan wun koo burgbetir na ni. Li taakpaak ni ki burgbetir na baar siaminba ki bi saa na.

Niib bonchiann nba din lon Yiisa bianjinba

²² Niib nba din biar mək-pootir po na, ki li ji din tan yent sanyiok ni, ki bi la burgbetyennkoo biar see leŋ, ki bi bann nan Yiisa won ki koo burgbetir na ki wei u poorpoweiteebi, kimaan baa won saa na, Yiisa won kaa bi ni.

²³ Ki burgbetlia bia nyii Taiberias ki baat ki per siaminba niib won dii jeet nba ki Yiisa won tur Yennu niipoouk li paak na. ²⁴ Nibur na nba la nan Yiisa kaa leŋ, ki u poorpoweiteeb bia kaa na, ki bi saan koo burgbeta na ni, ki saan Kapenaum, a bin lomɔ.

Yiisa nba tee manfoor jeet bianjinba

²⁵ Niib na nba din poot məkgebenjir maŋ na, ki bi la Yiisa, ki boio a, “Wanntoo, a baar nna nlee yooe?” ²⁶ Ki Yiisa yetib a, “Barmoniie ki n beeri na, maa won turi jeet ki i dii gboo nae te ki i loonin na, ŋaan li ki tee yaa la n bakitnaun toonjaana na kaa. ²⁷ I daa tuun toonn jeet nba biir paaki, ŋaan ii tuun toonn jeet nba mək manfoor nba kaa gbennu na paak. Min Nisaarik Bike saa turi li jebooru, kimaan n Baa Yennu-e turin yiikoo na a mii teeni, kimaan u numm gbooma.”

²⁸ Nanne ki bi boio a, “Ti sii tuun bee ki li tee Yennu toona?” ²⁹ Ki Yiisa jiimm a, “Toonn nae ki Yennu loon yii tuun: Ii teen wunba ki u tumɔ na yada.” ³⁰ Ki bi bia boio a, “Toonjaanlanpoe ki a saa tun ki tin la ki teena yada? A saa tun bee?”

³¹ Ti yeejamm nba din be muuk ni yoo nba na, bi din tuu di jeet nba ki bi yi mana na, nan laa sob Yennu gbounj ni bianjinba na, a 'Moses din teemm jeet nba nyi Yendouj ni a bii di.' " ³² Ki Yiisa yetib a, "Barmoniie ki n beeri na, li ki tee Moses kaa din teeni jeet manj, njaan li din tee n Baa Yennu-e. Ki motana ki u ji loon wun turi jeet nan monii nba nyi u boor. ³³ Jeet nba ki Yennu teeni manj, njaanne tee wunba nyii Yendouj ni ki teen tingbouj na njaateeb manfoor." ³⁴ Ki bi yeto a, "Chanbaa, ii teent jeet manj daar kur." ³⁵ Ki u betib a, "Mine tee manfoor jeet manj. Daano nba baar n boor, kon kan mi sooro, ki wunba teenin yada, nyunnyukuru kan mi sooro.

³⁶ "N poj beti nan i lama, njaan ki teenin yada. ³⁷ Njaan wunba kur ki n Baa Yennu jiu ki turin, u saa baar n boor ki teenin yadawa. N kan mi yet wunba baar n boori, ³⁸ kimaan n nyii Yendouj ni ki sik maa n tun Yennu nba tumin na yanboote, njaan li ki tee n moj yanboot kaa. ³⁹ Njo Yennu nba tumin na, u loomm tee a binba ki u turin nae nan yenokowa daa boori, njaan man tan fiimm kuun ni durinya gbennu daar. ⁴⁰ Nnae ki n Baa Yennu loon, a soo kur nba bann min, u Bija, ki teenin yada, u saa la manfoor nba kaa gbennu; ki n tan saa fiimm kuun ni durinya gbennu daar."

⁴¹ Njaanne ki Juu teeb manj ji burin nan leeb, waa yaa njoee tee jeet nba nyii Yendouj ni na paak. ⁴² Ki bi boi leeb a, "Yiisa nba tee Joosef bija na kaa na-a? Ti mi u baa nan u naa. Nlee ki u yaa u nyii Yendouj ni?"

⁴³ Ki Yiisa betib a, "I daa burin nan leeb maa pak linba na paaki. ⁴⁴ Soo kan fit baar n boor

ki teen n yoo, ki li ki tee ki n Baa Yennu nba tumin na kaa te ki u baari, ki n tan saa fiin li daano kuun ni, durinya gbennu daar. ⁴⁵ Yennu sokiniinba din sob Yennu gboun ni a 'Yennu saa wann soo kur.' Soo kur nba gbiintir n Baa Yennu ki bia gaan u maan, hooe saa baar n boor ki kpant n yoo. ⁴⁶ Naan soo daa ki mi la n Baa Yennu manj, see min nba nyii u boor na kooe laato.

⁴⁷ "Barmoniie ki n beeri na, daano nba teenin yada, hooe mok manfoor nba kaa gbennu. ⁴⁸ Mine tee manfoor jeet na. ⁴⁹ Yoo nba ki i yeejamm din be muuk ni na, bi din tuu di mana mane, naan bi kpowa. ⁵⁰ Naan jeet nba nyi Yendoun ni na, wunba diir, u kan kpo. ⁵¹ Mine tee manfoor jeet nba nyii Yendoun ni na. Wunba dii jeet manj sii be nan yoo nba kaa gbennu, ki jeet nba ki n saa turo na tee n gbanante, ki n tan saa jii n gbanant manj ki chab, ki tingboun na naateeb n fit la manfoor manj."

⁵² Nanne ki moniok fiir Juu teeb manj sinsuuk ni ki jiin Yiisa nba pak linba na po, ki bi boi bi leeb a, "Nlee ki joo na saa turit u gbanant ki tin di?" ⁵³ Ki Yiisa betib a, "Barmoniie ki n beeri na, see ki i nman min Nisaarik Bik gbanant, ki bia nyuu n son. Nna-i kaa, i kii mok manfoor manj i ni. ⁵⁴ Ki daano nba nman n gbanant ki bia nyuu n son, u mok manfoor nba kaa gbennu, ki n tan saa fiino kuun ni, durinya gbennu daar. ⁵⁵ Kimaan n gbanante tee jeet nan monii, ki n son mun tee bonnyukar nan monii; ⁵⁶ ki daano nba nman n gbanant, ki bia nyuu n son, hooe be n ni, ki n mun be u ni.

⁵⁷ “N Baa Yennu nba yen manfoor nae tumin, ki u paake ki n mun mɔk manfoor. Li mun bia sii tee nnae, wunba nman n gbanant, n paak, u sii mɔk manfoor. ⁵⁸ Mine tee jeet nba nyii Yendɔnɔ ni ki sik. Ki wunba dii jeet na, u sii yɔɔ be nan yoo nba kaa gbennu; ki jeet maɲ ki tee nan jeet nba ki i yeejamm din dii njan tan kpo na kaa.”

⁵⁹ Yiisa-e din pak linba na, waa daa din be Kapenaum, Yenjiantu diiuk ni, ki want niib na.

Manfoor nba kaa gbennu labaar

⁶⁰ Yiisa poorpoweiteeb bonchiann nba din gbat u wannu maɲ, ki bi yeen bi leeb a, “Wannu na paar ki turit. Nmee saa sak linba na?” ⁶¹ Soɔ din ki wann Yiisa njarimi, njan u din bann nan u poorpoweiteeb na mɔk bunburimii u wannu maɲ paak. Ki u boib a, “Maan nae te ki i birisimi-i? ⁶² Li-i tee ki i la min Nisaarik Bik do Yendɔnɔ ni siaminba ki n din tuu be na, i ji sii dukii nlee? ⁶³ Yennu Seyeenje teen niib manfoor; njan gbanant na tee yanne. Mɔmaan nba ki n pak turi nae baat nan Yennu Seyeenje nba teen niib manfoor maɲ. ⁶⁴ Njan i siab lek ki teenin yada.”

Yiisa din pakib linba na, kimaan sinsinn u pon mi binba tan kan teenɔ yada, nan wunba mun tan saa nyi u poor. ⁶⁵ Ki u bia namm yet a, “Li paake te ki n beti a soɔ kan fit baar n boor ni ki teen n yɔɔ, see ki n Baa Yennu-e te ki u baar.”

⁶⁶ Li paake te ki u poorpoweiteeb bonchiann din nmat poor, ki ji ki tokii nano. ⁶⁷ Nanne ki u din boi u poorpoweiteeb piik nan banlee na a, “Ki i mun saa nyikima-a?” ⁶⁸ Ki Simonn Piita jiino a, “Ti Yomdaano, ti mun ji saa nyika njan

saan ηmee boori? Fine mək manfoor nba kaa gbennu wannu. ⁶⁹ Ki mətana ti teena yadawa ki mi nan fine tee Yennu popeendaano.” ⁷⁰ Ki Yiisa yetib a, “Yimm jab piik nan banlee na, mine ganni, ηaan ki i ni yeno tee Sintaanii yoo.” ⁷¹ U din yet ki jiin Judas nba tee Simonn Iskariot bija na poe; ηooe din tee u poorpoweiteeb piik nan banlee na yeno, ηaan lek yaa wun nyi u poor.

7

Yiisa waarii nba ki teeno yada bianjinba

¹ Li poorpoe ki Yiisa ji din be Galilii yent ni, ki lin lej digbana. U din ki loon wuu be Judea yent ni, kimaan Juu teeb yudamm nba be lej na loon bin kpiue. ² Ki Juu teeb jaamm nba ki bi yi lanbont jaamm na tan per. ³ Nanne ki Yiisa waarii yeto a, “Nyikin nna, ηaan saan Judea yent ni, ki a poorpoweiteeb nba be lej na n la toona nba ki a tuun na. ⁴ Li-i tee ki niro loon wun wann u moη nan u tee soo, li ki ηan ki wun bor toona nba ki u tuumi. Li-i tee ki a tuun toonjaana, fan wann niib paanu ni nan a set tee li daano.” ⁵ U waarii na lek daa din ki teeno yada; li paak ki bi pako nna maη. ⁶ Ki Yiisa jiimm a, “N yoo daa ki baari. Yimm ηarin, yoo kur ηane ki turi, ⁷ kimaan tingbouη na ηaateeb ki namiini, ηaan min ηarin bi namin, kimaan maa beerib a bi sonii ki ηan na paak. ⁸ Ton, yimm-ii saa jaamm maη, ηaan min ηarin daa ki saa, kimaan n yoo daa ki baari.” ⁹ U din betib nnae, ηaan biar be Galilii.

Yiisa nba din saan jaamm maη bianjinba

10 Yiisa waarii na din saan jaamm naewa, ki Yiisa tan wei. U din ki saan paanu ni kaa, ŋaan u din bore ki saan.

11 Ki Juu teeb yudamm din lin loono jaamm maŋ ni, ki boi niib a, “U be lee?” 12 Ki niib bonchiann nba be lej na burin bonchiann ki jiin u po; ki siab yaa, “U tee niŋanoe,” ki leeb yaa, “Aaii, u kpann niibe;” 13 ŋaan soo din ki pak u po paanu ni, kimaan bi tiin Juu teeb yudamm na jaŋmaanii.

14 Baa dii jaamm na ki koo sinsuuk ni yoo nba, ki Yiisa saan koo Yenjiantu ŋasaakak ni, ki piin want niib Yennu maan. 15 Juu teeb nba gbiintiro yoo nba, ki li teemm bakitnaun; ki bi boi a, “Nlee ki niro na jia mi gbouŋ nna, ŋaan ki koo ti sakursaakari?” 16 Ki Yiisa yetib a, “Maa want wannu nba na, li ki tee n moŋ wannu kaa, ŋaan li nyii Yennu nba tumin na boore. 17 Wunba loon wun tun Yennu yanbootoona, ŋooe saa bann nan linba ki n want na nyii Yennu boor, koo n piak n moŋ yare. 18 Daano nba piak u moŋ yar, ŋoo loon baakir ki teen u moŋe. Ŋaan wunba loon niib-ii baakit wunba tumo na, ŋooe tee popeendaano, ki ki mok biiti.

19 “Moses kaa din turi sennu na-a? Ŋaan i soo ki dia sennu maŋi. Ki bee ki i loon yin kpimi?”

20 Ki niib na yeto a, “Narinbiuk be a ni. Ŋmee yaa wun kpiani?”

21 Ki Yiisa betib a, “N tun toonjaann foon daar, ki toonn maŋ teen i kura bakitnaun. 22 Ŋaan li-i tee ki i pot bonjabik foon daar, i mun tun toonn foon daare na. Moses-e din senn a yii porii i bonjai, ŋaan i yeejamme din piin punpotu sinsinn. 23 Ton, li-i tee ki i porii

bonjabis foon daar, a i daa kpet Moses sennuie, bee ki i donn wutoor n paak maa te ki baatoo la laafia foon daar na? ²⁴ Daa gorii niro nanyer po binbenj ki bu u buuti, naan i tuu dukin fanuwa ki la li barmonii.”

Niib na nba boi bi leeb ki jiin Yiisa po bianjinba

²⁵ Nanne ki Jerusalem nisiab boi bi leeb a, “Niro nba na kaa ki bi yiab a bin kpiu na-a? ²⁶ Gotir, u piak paanu nie, ki soo mun bia ki pak siar a wun tiau. Li pasiar ti yudamm dukii a u tee Yennu Niganntoo Masia nae. ²⁷ Ti mi joo na nba nyii siaminba, naan Yennu Niganntoo Masia na-i tanji baar, soo kan bann waa nyii siami.”

²⁸ Yiisa nba want niib Yenjiantu nasaakak ni na, ki u tan pak sanpaapo a, “I dukii nan i min bonjann, ki bia dukii a i mi maa nyii sian. N ki baar n moŋ baaru kaa. Daano nba tumin na, hooe tee barmonii; ki i ki miu. ²⁹ Naan min miu, kimaan n nyii u boore, hooe tumin.”

³⁰ Nanne ki bi ji yiab a bin sooro, naan bi soo ki sooro, kimaan u sooru yoo daa din ki baari. ³¹ Nibur na ni bonchiann din teeno yada, ki boi bi leeb a, “Yennu Niganntoo Masia na-i tanji baar, u saa tun toonjaana ki lin gar joo na yara-a?”

Yiisa nba yaa u saa yaat bianjinba

³² Ki Farisiinba na gbat niib na burin ki jiin Yiisa po, ki namm nan mannteeb yudamm tun Yenjiantu nasaakak guura a bin saan ki soor Yiisa. ³³ Naan ki Yiisa bet nibur na a, “N sii be nani yoo waaminnae, ki li poorpo ki n nmat ki saan wunba tumin na penj. ³⁴ I tan saa lon n boor, naan kan lami, kimaan siaminba ki n tan sii be

na, i kan fit baar lenji.” ³⁵ Ki Juu teeb tɔondamm na boi bi leeb a, “U yaa wun tan saan lee, ki ti kan lau? U yaa wun tan saan Griik doi ni, siaminba ki Juu teeb be na, kii sakii want Griik teeb na amii? ³⁶ Waa yet a ti tan saa lon u boor ɲaan kan lau, ki bia tan kan fit saan siaminba ki u sii be na, li paak tee bee?”

Manfoor nyun labaar

³⁷ Tɔn, jaamm maɲ gbennu daar din tee dajaanne. Li daar maɲe ki Yiisa fiir set ki pak sanpaapowa a, “Wunba ki nyunnyukuru gbatɔ, wun baar n boor ki tan nyu, ³⁸ kimaan Yennu gbouɲ yet a ‘Wunba teenin yada, manfoor nyun sii tɔ nyunkpanae ki nyi u par ni.’ ” ³⁹ Yiisa nba din piak na, u din want Yennu Seyeen poe; ki binba teen Yiisa yada na yaa bin tan la Seyeen maɲ. Li yoo na Yennu daa din ki tur niib Seyeen maɲi, kimaan u daa din ki donn Yiisa.

⁴⁰ Niib bonchiann nba din be nibur na ni ki gbat ki u yet nna maɲ, ki bi yet a, “Jɔɔ na set tee Yennu sokiniiie nan barmɔnii,” ⁴¹ ki siab yaa, “U tee Yennu Niganntɔɔ Masia-e,” ki leeb mun yaa, “Yennu Niganntɔɔ Masia na kan nyi Galilii. ⁴² Yennu gbouɲ wann a Masia na tan sii tee Defid yaaboonne, ki bi bia tan saa marɔ Betlehem doo nba tee ɲɔɔ Defid doo na nie.” ⁴³ Ki niib na ji mɔk dudukit jiaɲ jiaɲ ki jiin Yiisa po. ⁴⁴ Ki siab bia loon bin soorɔ, ɲaan bi sɔɔ ki soorɔ.

Juu teeb yudamm nba ki teen yada bianjinba

⁴⁵ Li poorpoe ki guura na ji ɲmat mannteeb yudamm nan Farisiinba na boor; ki bi boib a, “Bee teen ki i ki jen nanɔ?” ⁴⁶ Ki guura na

jiin a, “Soo daa ki mi pak mabooru nba ki joo na piak na.” ⁴⁷ Ki Farisiinba na boib a, “Ki u kpann i mune-e? ⁴⁸ I tan mi la ki ti yudamm koo Farisiinba soo teeno yada-a? ⁴⁹ Nnaan nighboun na nba ki mi Yennu sennu na, mopor be bi paak.”

⁵⁰ Ki Farisiinba man ni yenoe tee Nikodemus. Njoe tee daano nba din saan sianyoo, a wun saa la Yiisa na; ki u betib a ⁵¹ “Ti sennu ki wann nan ti bu nirɔ buut ki biirɔ, nnaan daa ki gbat u mob ni ki bann waa tun linba.” ⁵² Ki bi boio a, “A mun ji tee Galilii nirɔe-e? Gotir Yennu gboun ni. A saa la nan Yennu sokinii ki mi nyii Galilii yent ni.”

8

Poochonchonsoo labaar

((¹ Li poorpoe ki soo kur kun, nnaan ki Yiisa doo Olif Tiinii kunkonn na paak. ² Ki li yent sanyapob ni, ki u nmat koo Yenjiantu nasaakak na ni; ki niib bonchiann tikir lintɔ, ki u kar ki wantib.

³ Nnanne ki sennu wanteeb nan Farisiinba baar nan poo nba tun bonchonchontoonn na, ki te ki u set bi kur tɔonn, ⁴ nnaan ki bi yet Yiisa a, “Wantɔɔ, ti la poo na, ki u tuun chonchontoonne, ki ti sooro li yoo na. ⁵ Ti sennu ni, Moses din senn a li poobooru nan ki bin jaato tanae ki kpiu, ki fin narin yaa bia?” ⁶ Bi din yet nna, ki loon bin kpar Yiisa-e, ki fit la u biit. Ki Yiisa tibin ki jii niibir ki sobin tin ni.

⁷ Baa see ki boio buboit na, ki u tibit ki betib a, “Wunba ki mi tun toonbiit, li yoo n sint jaa poo na tann,” ⁸ nnaan namm tibin ki sobin tin ni.

⁹ Baa gbat ki u yet nna man, ki bi yat yeno yeno,

ki nikpera na don yaat. Ki Yiisa biar, ki poo na bia daa see u toonn. ¹⁰ Ki u tibit boio a, “N niipoo, bi be lia? Soo ki biar a wun pak biirani-i?” ¹¹ Ki u jiin a, “Chanbaa, soo ki biari.”

Ki Yiisa yeto a, “N mun kan pak biirani. Ii kun. A ji daa mi tuun toonbiiti.”)

Yiisa nba tee durinya yentu bianjiba

¹² Nanne ki Yiisa bia pak nan niib Yenjiantu nasaakak ni a, “Mine tee tingboun na niib yentu, ki daano nba waan, nsoe sii mok yentu nba yentir u binben, ki u kii turin bunbonn ni.” ¹³ Ki Farisiinba na bia yeto a, “Faa piak ki want a mon po na, naan li tee yanne.” ¹⁴ Ki Yiisa betib a, “Mi-i lekii piak ki want n mon poie, naan maa yeen linba, li tee moniie, kimaan min mi maa nyii siaminba, ki bia mi maa saa siaminba. Yimm narin ki mi maa nyii siami, ki bia ki mi maa saa siami. ¹⁵ Yimm gorii niro nanyer poe ki bu u buut, naan min narin ki bu soo buuti. ¹⁶ Mi-i ponii yaa n bu niro buut gbaa, n saa bu u buut nan barmoniie, kimaan n ki bu buut n kuukoo kaa, naan n Baa nba tumin nae be nanin. ¹⁷ Ton, li pon sob i sennu ni a niib banlee siara-i jami, nanne tee barmonii. ¹⁸ N piak want n mon po, ki n Baa nba tumin na mun bia piak want n po nnae.” ¹⁹ Ki bi boio a, “A baa man be lee?”

Ki Yiisa jiimm a, “I ki mimi, ki tan boi n Baa. I-i bonni mimie, i bia bo sii mi n Baa.”

²⁰ Yiisa din pak maan na, yoo nba ki u want niib Yennu maan, Yenjiantu nasaakak ni, siaminba ki bi sent Yennu piinii lakir nae; naan soo ki sooro, kimaan u sooru yoo daa ki baari.

Yiisa nba kpaan Juu teeb na bianjinba

²¹ Ki Yiisa bia namm yetib a, “N saa yaata, ki i tan saa lomin ki kan lami. I tan saa kpo n̄aan poŋ ki la nyikinhab; i bia tan kan fit saan maa saa siami.”

²² Nanne ki Juu teeb na yet a, “U yaa ti kan fit saan waa saa siami. U yaa wun kpi u m̄oŋe-e?”

²³ Ki Yiisa jiin a, “Yimm tee tin̄ na ni yabe, n̄aan min tee sanpaapo yooe; yimm nyii tingboun̄ na nie, n̄aan min ki nyii tingboun̄ na ni kaa. ²⁴ Li paake te ki n yeti maa i tan saa kpo n̄aan poŋ ki la nyikinhab na; ki li-i tee ki i ki teen yada nan n tee maa tee wunbae, i set saa kpo n̄aan poŋ ki la nyikinhab.” ²⁵ Ki bi boio a, “A tee n̄mee munii?”

Ki u jiimm a, “N tee wunba ki n tuu yoo beeri nae. ²⁶ N bo sii fit piak maan bonchiann ki biiri; n̄aan wunba tumin nae tee barm̄onii daano; ki n beer tingboun̄ na niib linba ki n gb̄ia u boor nae.”

²⁷ N̄aan niib na din ki mi nan u piak u Baa Yennu poe. ²⁸ Li paak ki Yiisa betib a, “Yoo nba ki i saa jii min Nisaarik Bik ki donn sanpaapo na, li yooe ki i tan saa bann nan n tee maa tee wunbae, ki i bia saa bann nan n ki tuun siar nan n m̄oŋ yikoo, n̄aan n bia yeen linba ki n Baa wannin a n yete. ²⁹ N̄oo nba tumin nae be nanin. U ki nyikitin, kimaan n tuun linba gboot u numme.”

³⁰ Niib bonchiann nba din gbat ki Yiisa pak nna maŋ, ki bi teeno yada.

Binba set nyii daabisin ni labaar

³¹ Nanne ki Yiisa yet Juu teeb nba teeno yada na a, “Li-i tee ki i saak n m̄omaan, i set tee n

poorpoweiteebe, ³² ki i bia saa bann barmōnii na, ki barmōnii maŋ saa nyinni daabisin ni.” ³³ Ki bi yeto a, “Ti tee Abraham yaaboonae, ti ki mi teen soo daaba. Nlee ki a yaa ti tan saa nyi daabisin ni?”

³⁴ Ki u yetib a, “Barmōniie ki n beeri na, soo kur nba tuun toonbiit, u tee biit daabire. ³⁵ Daabir ki tee ŋaak yoo kaa, ŋaan ŋaak bik ŋarin tee ŋaak yooe yoo kur. ³⁶ Li-i tee min Yennu Bija nyinti daabisin niie, i set saa nyi nan barmōniywa. ³⁷ N mi nan i tee Abraham yaaboonae, ŋaan ki i lek yiab a yin kpin, kimaan n maan maŋ ki koo i tuba ni. ³⁸ Maa tuu be n Baa peŋ ki laat linba, ŋanne ki n piak, ŋaan yimm tuun linba ki i baa beti a yii tuun nae.”

³⁹ Ki bi jiino a, “Ti baa tee Abraham-e.”

Ki Yiisa betib a, “Li-i tee ki i bo tee Abraham waas nan mōniie, i bo sii tuun Abraham toonbooru nae, ⁴⁰ ŋaan ki motana ki i yiab a yin kpin, ŋaan ki n tee niro nba beeri barmōnii nba ki n gbat Yennu boor na. Abraham ŋarin din ki tun nna. ⁴¹ ŋaan yimm tuun i baa nba tuun bianinbae.”

Ki bi jiin a, “Timm ki tee kpenŋmia kaa. Ti mok baa yenokooe, ki ŋooe tee Yennu.”

⁴² Ki Yiisa betib a, “Li-i bonni tee ki Yennu moŋ tee i baa, i bo sii loonima, kimaan n nyii ŋoo Yennu peŋe ki baar nna. N bia ki baar nan n moŋ yaak kaa, ŋaan ŋooe tumin. ⁴³ Bee teen ki i ki bann n maan na paaki? kimaan yaa ki fit gbiin n maan maŋ na. ⁴⁴ I tee i baa Sintaanii waase, ki loon yii tuun i baa maŋ yanbootoona. Pinpiik niwa u poŋ tee nikpiiruko, ki bia fok nan

barmōnii, kimaan barmōnii kaa u ni nan waama. Ki wuu faar faak, li poŋ tee u toonkpere, kimaan waa tee faak daano na. Fai kur nyi u boore. ⁴⁵ Maa beeri barmōnii nae te ki i ki teenin yada. ⁴⁶ I ŋmee saa fit wann n biiti? Aaii, soo kaa. Maa beeri barmōnii bianjinba na, bee teen ki i ki teenin yada? ⁴⁷ Wunba nyii Yennu boor, ŋooe gbia Yennu maan; ŋaan yaa ki nyii Yennu boor na, li paake ki i ki gbia Yennu maan maŋi.”

Ki jiin Yiisa nan Abraham po

⁴⁸ Nanne ki Juu teeb na yet Yiisa a, “Taa yet a, ‘Fin Samaria niro na, narinbiiuk be a ni’ na, li ki tee nna kaa-a?” ⁴⁹ Ki Yiisa jiin a, “Narinbiiuk kaa n ni. Min baakit n Baa Yennu, ŋaan ki yimm ŋarin sianin. ⁵⁰ Min kaa loon baakir ki teen n moŋi. Yennu-e loon ki niib n turin baakir, ki ŋooe tee buut daano. ⁵¹ Barmōniie ki n beeri na, daano nba saak n maan, u kan mi kpo.”

⁵² Ki Juu teeb na beto a, “Motana ti set bann nan narinbiiuk be a ni. Abraham din kpowa, ki Yennu sokiniinba bia kpowa, ŋaan ki a yaa daano nba saak a maan kan mi kpo. ⁵³ Ti chanbaa Abraham nba din kpo na, a mi a a cheeue-e? Yennu sokiniinba bia din kpowa. Ii got! Fin mi a a tee ŋmee?” ⁵⁴ Ki Yiisa jiimm a, “Mi-i bonni dontir n moŋie, li bo sii tee yanne, ŋaan wunba dontirin nae tee n Baa. Nooe tee daano nba ki i yaa u tee i Yennu na. ⁵⁵ I ki miu, ŋaan min ŋarin miu. Li-i bonni tee ki n yaa n ki miu, n bo saa teen faak daano nan yimm nawa. Nnaan n miu, ki bia saak u maan. ⁵⁶ I chanbaa Abraham din mok parpeenn

bonchiann, nan waa yaa wun tan la yoo nba ki n saa sik tingboun na ni; ki u set tan la yoo manja, ki li manja.” ⁵⁷ Ki Juu teeb na boio a, “A daa ki baar binpiinnmu, naan din la Abraham-ii?” ⁵⁸ Ki Yiisa jiin a, “Barmoniie ki n beeri na, baa din tan maar Abraham na, naan soo ki min narin kpan be-e.” ⁵⁹ Nanne ki bi ji tokii tana a bin jaato ki kpiu; ki u nmiat ki nyii Yenjiantu nasaakak na ni.

9

Yiisa nba din nyooont jajoon bianinba

¹ Li poorpoe ki Yiisa din lin ki saa la joo nna, ki u tee joo, u maaru niwa. ² Ki u poorpoweiteeb boio a, “Wanntoo, nmee toonbiite te ki bi mar joo na jooji? Li daa tee u mooj toonbiit amii u damme?” ³ Ki u jiimm a, “U toonbiit paak kaa te ki u joo. Li mun bia ki tee u damm toonbiit paak kaa, naan u joo a Yennu n te ki wun nyooonte, ki niib n la Yennu toonjaann. ⁴ Yoo nba ki yentu daa be na, li kpaalase ki tii tuun wunba tumin na toona, kimaan nyiook baat, ki soo tan kan fit tun tooni. ⁵ Maa daa be tingboun na ni na, n tee tingboun na niib yentue.”

⁶ Waa yet nna man poorpoe ki u siir mosant tin ni, ki buun tant, ki por joo na ninbina, ⁷ naan beto a, “Ii saa Siiloam* bioj ni ki saa yibir.” (Siiloam paake tee “Te.”) Ki u saan ki saa yibir, ki nyooont, ki kun.

⁸ Nanne ki u leeb nan niib nba tuu laato ki u tee miato na boi bi leeb a, “Jajoon nba tuu mei

* **9:7** 9.7 Bi din te ki nyun tokii loonue ki siik bioj na ni.

na kaa na-a?" ⁹ Ki siab yaa, "Njooe," ki leeb yaa, "Aaii, njoo kaa. U naanoe." Nanne ki joo man tioon yet a, "Mine na." ¹⁰ Ki bi boio a, "A teen nlee ki tan nyooanti?" ¹¹ Ki u jiimm a, "Joo nba ki bi yiu Yiisa na, njooe buun tant ki por n ninbina, njaan betin a mii saa Siiloam bioon ni ki saa yibir; ki n saan ki saa yibir ki nyooant."

¹² Ki bi boio a, "U be lee?"

Ki u jiin a, "N ki mi."

Farisiinba nba boi jajoon na u nyooantu po bianjinba

¹³ Nanne ki bi jii joo man ki saan nano Farisiinba boor. ¹⁴ Daar nba ki Yiisa buun tant ki nyooant joon na din tee foon daare. ¹⁵ Ki Farisiinba na bia namm boi joo na a u teen nlee ki nyooanti. Ki u betib a, "Yiisa-e buun tant ki por n ninbina, ki n yibir ki nyooant."

¹⁶ Ki Farisiinba na siab yet a, "Yiisa ki nyii Yennu boor kaa, kimaan u ki dia foon daar sennu na."

Ki bi siab mun boi a, "Nlee ki biitdaano sii fit tuun toonjaana na booru?" Ki bokitu baar Farisiinba na sinsuuk ni.

¹⁷ Li paak ki bi namm boi joo na a, "Joo nba nyooanta na, a dukii nlee u po?"

Ki u bia jiimm a, "U tee Yennu sokiniie."

¹⁸ Ki li lek paar nan Juu teeb yudamm na n teen yada nan bi maro jooone ki u tan nyooant. Nanne ki bi yiin u damm, ¹⁹ ki tan boib a, "U tee i bijae-e? I set yaa i maro jooone-e? Ki li teen nlee ki u ji laat motana?" ²⁰ Ki bi jiin a, "Ti mi nan u tee ti bija narime, ki ti bia mi nan ti maro jooone.

²¹ Naan ti ki mi laa teen bianjinba ki u tan nyooant,

ti bia ki mi wunba nyooṅto. U moṅ ji ki tee bik kaa. Boimoṅ man. U saa fit pak u moṅ paaka.”
²² U damm din yet nna maṅ, kimaan bi tiin Juu teeb yudamm na jaṅmaanii, kimaan yudamm maṅ poṅ taan moḅ ki yet a wunba yaa Yiisa-e tee Yennu Niganntoo Masia, see ki bi nyinno bi Yenjiantu ni. ²³ Li paak te ki u damm din yaa u ki tee bik kaa, a bin boio.

²⁴ Li taar munlee nie ki bi bia ṅamm yiin joo nba tuu tee jooṅ ṅaan tan nyooṅt na, ki tan beto a, “Ii teen Yennu-e baakir nan niipoouk; kimaan ti mi nan Yiisa ṅarin tee biitdaanoe.” ²⁵ Ki joo na yetib a, “Waa tee biitdaano koo waa ki tee, n ki mi. ṅaan bonyennkooe ki n mi: n tuu tee jooṅe, ṅaan motana n ji laat.”

²⁶ Ki bi ṅamm boio a, “U teen nlee ki nyooṅtani?” ²⁷ Ki u jiimm a, “N poṅ betiwa, ṅaan ki i ki ghati. Bee ki i loon ki n ṅamm betini? I mun loon ki i teen u poorpoweiteebe-e?” ²⁸ ṅanne ki bi wutoor ji doo, ki bi sukiiṅ, ṅaan beto a, “Fine tee niro maṅ poorpoweitoo, ṅaan timm ṅarin tee Moses poorpoweiteebe.” ²⁹ Ti mi nan Yennu din piak nan Moses, ṅaan niro na ṅarin, ti ki mi waa nyii siami.” ³⁰ Ki joo nba nyooṅt maṅ yetib a, “Bia paruko mani, ki i tan yaa i ki mi waa nyii siami, ṅaan u nyooṅt n nuniwa.” ³¹ Ti mi nan Yennu ki gbia biitdamm miaru, ṅaan gbia damm nba jiantiro ki tuun waa loon bianjinbae. ³² Laa nyii durinya piinu niwa, ti daa ki mi gbat a soo nyooṅt wunba ki bi maro jooṅi. ³³ Li-i bonni tee ki joo maṅ ki nyii Yennu boori, u bo kan fit tun bakitnaun toonn

na booru.”

³⁴ Ki bi jiin a, “Fin nba ki bi mara nan biit na po, a tee ηmee ki want timmi?” Ki bi nyinno bi Yenjiantu ni.

Ninyentir labaar

³⁵ Yiisa nba gbat a bi nyinno bi Yenjiantu ni na, ki u lomo ki tan lau, ki boio a, “A teen Nisaarik Bik na yadawa-a?” ³⁶ Ki u boio a, “Chanbaa, ηmee tee Nisaarik Biki? Betirin waa tee wunba, ki n teeno yada.” ³⁷ Ki Yiisa beto a, “A poη lauwa. Njooe tee min nba piak nana na.” ³⁸ Ki joo na yeto a, “N Yomdaano, n teena yadawa,” ηaan gbaan u toonn ki jianto.

³⁹ Nanne ki Yiisa yet a, “N baar tingbouη na ni a n bu niib buut, ki bia yent binba ki mək ninyentir na numm poe, ηaan dokin binba mək ninyentir na numm po.” ⁴⁰ Ki Farisiinba nba be lej na gbat ki u yet nna, ki bi boio a, “A yaa ti mun ki mək ninyentire-e?” ⁴¹ Ki u jimm a, “Li-i bonni tee ki i ki mək ninyentiri, i bo kii mək biiti, ηaan yaa sat yaa i mək ninyentir na, i mək biit.”

10

Barjouk nba jiin pekpaarik po

¹ Ki Yiisa ηamm yetib a, “Barmoniie ki n beeri na, nirō nba ki tokin pelook tammob ki koo, ηaan doo joonn ki koo, li yooe tee nanyuko. ² Nnaan nirō nba tokin pelook na tammob ki koo, li yooe tee pei maη kpaarik. ³ Wuu taji baat a wun koo, tammoguuro na saa loote, ki wun koo; ki u yi u moη pei na sana, ki bi gbia u mob, ki u nyintib. ⁴ Wuu nyinn u moη pei kur yoo nba, u tuu gar bi

tõonne, ki bi waa u poor, kimaan bi mi u kunkõr.
⁵ Nnaan bi kan wei saamõ njarimi, see ki bi chiar, kimaan bi ki mi u kunkõri.” ⁶ Yiisa din yimm barjouk na, nnaan ki bi ki bann li paaki.

⁷ Li paak, ki u bia namm betib a, “Barmõniie ki n beeri na, mine tee pelook na tammõb. ⁸ Binba kur gar n tõonn ki baar na tee nanyukibe nan fat-teeb, ki pei na ki gbia bi mõbu. ⁹ Mine tee tammõb na, ki daanõ nba tõkin n ni ki kõõ, njoõ saa la tinnu, ki sii yõõ gaar kõõ, ki nmat nyi, ki laat jenant. ¹⁰ Nanyukõ narin baat a wun tan jan pei nae, ki bia kpib, ki bia biirib. Mine baar a bin la manfoor nba tee manfoor nan barmõnii.

¹¹ “Mine tee pekpaanjan, ki pekpaanjanep kenn u pei paak. ¹² Nnaan wunba kpaar pei likirii paak, ki ki tee pekpaarik nan mõnii, ki bia ki yen pei na, li-i tee ki u la kinkatir baat yoo nba, see ki u chiar nnaan nyik pei na; ki kinkatir na n ji baar ki soorib, ki binba tenn na n yat. ¹³ U tuu chiare, kimaan u kpaar pei na likirii paake, ki u baka kaa pei na po. ¹⁴⁻¹⁵ Mine tee pekpaanjan. N Baa Yennu nba mi-n, ki n mun miu na, li mun bia tee nnae ki n mi n pei, ki bi mun mi-n, ki n saa chibin n saanman bi paak. ¹⁶ Pelei be ki tee n yab, nnaan namm kaa pelook na ni. See ki n baar nan namm mun biak, ki bi saa sak n mõb, ki bi kur ji sii tee pebooryen, ki mõk pekpaaryen kõõ.

¹⁷ “N Baa Yennu loonin, kimaan n yaa n chab n manfoore, ki lin te man namm lar li poor po. ¹⁸ Sõõ kaa ki saa nyinn n manfoor manj, nnaan n mõne yaa n jii chab, kimaan n mõk yikoo ki saa fit chabir, ki bia mõk yikoo ki tan saa lar. Linba nae ki n Baa betin a n tun.”

¹⁹ Waa yet nna yoo nba, ki Juu teeb yudamm na bia ḡamm bokit; ²⁰ ki bi bonchiann yaa, “Narinbiiuk be u ni, ki waatuk bia məkɔ; ki bee teen ki i gbiintir u maami?” ²¹ Ki leeb mun yaa, “Nirɔ nba ki narinbiiuk be u ni kii piak nna. Nlee ki nirɔ nba ki narinbiiuk be u ni saa fit nyɔont jooŋi?”

Juu teeb yudamm nba yêŋ Yiisa bianjinba

²² Li poorpoewa ki bi tan mək bi jaamm nba ki bi teen Yennu niipoouk bi jiantu ḡasaakak paak na. Jaamm maŋ din be Jerusalem-e. Li yoo din tee waat yoee; ²³ ki Yiisa din somm lin barintir nba ki bi yir Solomonn barintir na ni, ki li be Yenjiantu ḡasaakak na ni. ²⁴ Ki Juu teeb yudamm din baar ki tikir lintɔ, ḡaan boio a, “A yaa lin yukir nleewa, ki tin tan bann nan a tee Yennu Niganntɔɔ Masia-a? Fi-i tee ḡooie, fan betit barmonii.” ²⁵ Ki Yiisa jiimm a, “N poŋ daan betiwa, ḡaan ki i ki teenin yada. Toona nba ki n tuun n Baa Yennu yiikoo ni nae want maa tee wunba. ²⁶ ḡaan yaa ki tee n pei na paak ki i ki teenin yada. ²⁷ N pei saak n mɔb, ki n mib, ki bi waan, ²⁸ ki n teemm manfoa nba kaa gbennu, ki bi kan mi kpo, ki sɔɔ bia kaa ki saa fit fatib n nuu ni. ²⁹ N Baa nba jiib ki teen n nuu ni na, ḡooe gar sɔɔ kur. Li paak ki sɔɔ kan fit fatib n Baa maŋ nuu ni. ³⁰ Min nan n Baa maŋ tee yomme.”

³¹ Li yoo na ki Juu teeb yudamm na tɔkii tana a bin jaatɔ ki kpiu. ³² Ki Yiisa yetib a, “I poŋ la ki n tun toonḡana bonchiann, linba ki n Baa Yennu yaa n tun, ki toonḡana maŋ ni, lann paake te ki i yaa i jaatimi?” ³³ Ki bi jiin a, “Ti ki loon ki tin

jaata tana toonjansiar paak kaa, naan faa jikit a moŋ ki yek nan Yennu na paak. A kpan tee nirɔe, naan yi a moŋ Yennu, li tee bonbilankante.” ³⁴ Ki Yiisa yetib a, “Li sɔb i moŋ sennu nba be Yennu gbouŋ ni na a ɲɔɔ Yennu yet a barbuura na tee u waase, ³⁵ ki ti mun mi nan Yennu gbouŋ kan faar faak faba; ki ɲɔɔ Yennu yib u waas, kimaan ɲamme tee niib nba ki u din pak u maan ki turib na. ³⁶ Naan min ɲarin, n Baa Yennu-e gannin ki tumin tingbouŋ na ni; ki maa yet a n tee Yennu Bija na, nlee ki i yaa li tee bonbilankanti? ³⁷ Li-i tee ki n ki tuun n Baa Yennu toonaie, ɲann i daa teen yada. ³⁸ Naan li-i tee ki n tuun ɲɔɔ Yennu toona maŋie, li-i lekii tee ki i ki teenin yada, naan yin teen n toona maŋ yada. Nanne ki i saa bann barmɔnii nan n Baa Yennu be n ni, ki n mun bia be u ni.” ³⁹ Nanne ki Juu teeb na yaa bin sooro; ki u buut nyii, ⁴⁰ ki ɲmat poot Jɔɔdann mɔk-pootir, ki saa be siaminba ki Joonn din tuu wuur niib Yennu nyunwuru na. ⁴¹ Niib bonchiann din baar Yiisa peŋ, ki piak nan bi leeb a, “Joonn ɲarin din ki tun toonjaansiari, naan linba kur ki u din piak ki jiin Yiisa po na tee barmɔniie.” ⁴² Niib bonchiann din teen Yiisa yada lenj.

11

Lasarus kuun labaar

¹ Tɔn, jasɔɔ din be Betani, ki u sann tee Lasarus, ki din tan yiar. Betani din tee Meeri nan u yɔɔɔ Maata dooe. ² Meeri-e din tee daano nba but tulaarii Yiisa taa paak, naan jii u yut ki fiar na. Ki Meeri maŋ naa bik Lasarus yiar.

Waa yiar na, ³ ki u niipoob Meeri nan Maata tun toonii, a wun saan ki bet Yiisa a, “Ti Yomdaano, a naasinyook nba ki a mantik loono na yiare.”

⁴ Yiisa nba gbat nna yoo nba, ki u yet u poorpoweiteeb na a, “Lasarus nba yiar na, yiaru man ki tee u manfoor terik kaa na, njan li tee linba ki niib saa dont Yennu sann li paake, ki bia saa dont min Yennu Bija sann mun.”

⁵ Ton, Yiisa lek din loon Maata nan Meeri nan Lasarus, ⁶ njan waa gbat a Lasarus yiar na, ki u biar daa njanlee ki daa be lenj.

⁷ Li poorpoe ki u tan bet u poorpoweiteeb na a, “Naant man ki tin nmat saan Judea.” ⁸ Ki bi yeto a, “Wanntoo, daa njanlelee nae ki Juu teeb yudamm na daan yaa bin jaata tana, njan ki a bia yaa ti nmat leni-i?” ⁹ Ki Yiisa betib a, “Yentu tuu be sanyiok nie ki saa tuu daajoouk. Li-i tee ki niro somm yonnu ni, u kan gbiati, kimaan waa laat tingbouj na yentu na paak. ¹⁰ Njan wuu somm nyiok, u gbiatire, kimaan yentu kaa.” ¹¹ Yiisa din yet nnae, njan bia yet a, “Ti yook Lasarus goonte, njan n saa saan fiinowa.” ¹² Ki u poorpoweiteeb na yeto a, “Ti Yomdaano, li-i tee ki u goontie, u saa la laafiawa.” ¹³ Yiisa din want nan Lasarus kpoe, njan namm din mi a u want a Lasarus goonte. ¹⁴ Li paak din te ki u ji betib gbenn a, “Lasarus kpowa, ¹⁵ njan i paak n mok parpeenn nan maa daan kaa u boor na, kimaan njanne saa te ki i teenin yada. Naant tin saan u penj man.” ¹⁶ Ki Tomas, wunba ki bi yiu Jaak na yet u leeb manj a, “Naant ki ti saan man. Li-i sakii tee kuun, timm nan njo n kpo.”

¹⁷ Yoo nba ki bi tan per Betani na, ki u gbat a baa pii Lasarus, li daa nanna na. ¹⁸ Betani din ki fok nan Jerusalem-i; li fokint din tee nan maar nanlee nae. ¹⁹ Li paak teen ki Juu teeb bonchiann din baar Maata nan Meeri pen, a bin maan bi para, kimaan bi naa bik na kuun paak.

Wunba fiint kpeemm ki teemm manfoa na labaar

²⁰ Maata nba tan gbat a Yiisa baat yoo nba, ki u nyii cheto, naan ki Meeri narin biar be naak ni. ²¹ Ki Maata bet Yiisa a, "N Yomdaano, li-i tee ki a daan bo be nna na, n naa bik na daan bo kan kpo. ²² Naan n mi nan motana gbaa, li-i tee ki a miar Yennu linba kur po, u saa turawa."

²³ Ki u beto a, "A naa bik na saa fiir kuun niwa."

²⁴ Ki Maata jiino a, "N mi nan u tan saa fiir kuun ni durinya gbennu daar, daar nba ki kpeemm tan saa fiir na."

²⁵ Ki Yiisa beto a, "Mine fiint kpeemm ki teemm manfoa. Daano nba teenin yada, nsoe sii mok manfoor, wuu lekii kpo gbaa; ²⁶ ki daano nba mok manfoor naan teenin yada, u kan mi kpo. A teen yada nan linba nawa-a?" ²⁷ Ki u jiin a, "N Yomdaano, nn, n teen yada nan fine tee Yennu Niganntoo Masia, ki bia tee nsoo Yennu Bija, wunba ki ti tuu daan u baaru na."

²⁸ Maata yet nna mane, naan nmat kun, ki saa yiin u waaroo Meeri soon nna, ki beto a, "Wanntoo na be nawa, naan yiaa." ²⁹ Meeri nba gbat nna yoo nba, ki u fiir yiama, ki saan u boor. ³⁰ Ki soo Yiisa daa ki baar digbanbik manji, naan daa be

siaminba ki Maata cheto na. ³¹ Ki Juu teeb nba be nan Meeri njaak ni ki maant u par na nba la ki u nyii yian na, ki bi mun wei nyii, kimaan bi mi a u saa kaauk boore a wun saa bui kpemɔnii.

³² Meeri nba baar Yiisa boor ki lau yoo nba, ki u gbaan u tɔɔnn, njaan yeto a, “N Yomdaano, li-i tee ki a daan bo be nna na, n naa bik na daan bo kan kpo.” ³³ Ki Yiisa la ki u mo, ki Juu teeb nba weio ki baar na mun mo, ki ninbaauk soor njoɔ Yiisa bonchiann, ki li daamiio. ³⁴ Ki u tan boib a, “I piiu liapoe?” Ki bi beto a, “Ti Yomdaano, wein ki tan got.” ³⁵ Ki Yiisa bui. ³⁶ Ki Juu teeb na yet a, “Gotir man waa jia loon Lasarus bianjinba.” ³⁷ Ki siab yaa, “Daano nba daan nyɔɔnt jooɔ na, u daan bo kan fit te ki Lasarus daa kpenni-i?”

Yiisa nba fin Lasarus kuun ni bianjinba

³⁸ Ki Yiisa par biir bonchiann, ki u saan kaauk na boor. Kaauk na din tee tanfioko, ki katanu bii li moɔ. ³⁹ Ki Yiisa betib a, “Biitir kaauk man man.”

Ki Maata, wunba tee kpeemmo na niipoo na, yeto a, “N Yomdaano, li sii poi hei, kimaan baa piiu, daa nanna na.”

⁴⁰ Ki Yiisa boio a, “N bo ki beta a li-i tee ki a teenin yada, a saa la Yennu nba mok panchioɔ bianjinba-a?” ⁴¹ Nanne ki bi biit kaauk na. Ki Yiisa gokit sanpaapo, njaan yet a, “N Baa Yennu, n teena niipoouk nan faa sak n miaru na. ⁴² N mi nan yoo kur a saak n miaru, njaan n yet nna, kimaan n loon nibur nba be nna na n gbat ki teen yadae nan fine tumin.”

⁴³ Waa yet nna maŋ, ki u yiin sanpaapowa a, “Lasarus, nyimin na.” ⁴⁴ Ki kpeemmo na nyii; ki katiŋ fin u taa nan u nii, ki chinchenbik boob u numm po. Ki Yiisa betib a, “Fintir katiŋ maŋ ki ŋaau.”

*Yudamm nba lor a bin kpi Yiisa bianjinba
(Matiu 26.1-5; Mak 14.1-2; Luk 22.1-2)*

⁴⁵ Juu teeb bonchiann nba din baar a bin maan Meeri par na nba la linba ki Yiisa tun na, ki bi teeno yada. ⁴⁶ Ŋaan ki bi siab saan Farisiinba peŋ, ki saa betib linba Yiisa tun.

⁴⁷ Li paak ki Farisiinba maŋ nan mannteeb yudamm yiin tintaankaanu, ki bi tikir ki boi bi leeb a, “Joo na tuun toonjaana bonchiann. Ti saa teen nlee? ⁴⁸ Ti-i ŋaan ki u ŋammit tuun nna ki pukii, soo kur saa teeno yadawa, ki Rom teeb n tan baar ki yeer Yenjiantu ŋasaakak na, ŋaan bia boont ti niib.” ⁴⁹ Ki bi yeno nba ki bi yiu Kayafas, ki u tee mannteeb yudaano li binn ni na, yetib a, “Yimm ŋarin ki mi siari. ⁵⁰ I ki mi nan li ŋan ki niyeno koo n gaar niib na kur paak ki kpo, ki gar ti niib kur n tan boonti-i?” ⁵¹ U din ki pak linba na nan u yan kaa, ŋaan waa din tee mannteeb yudaano binn maŋ ni na paak, ki Yennu te ki u pak masokinkar na, a Yiisa tan saa gaar Juu teeb paak ki kpo. ⁵² Ŋaan li ki tee Juu teeb kuuko kaa ki u tan saa gaar bi paak ki kpo, ŋaan nan binba kur tee Yennu niib ki yat be tingbouŋ na ni nae ki u saa gaar bi paak ki kpo, ki bin taan leeb kii tee yomm.

⁵³ Laa nyii li daar ki saa, ki Juu teeb yudamm na lor a bin kpi Yiisa. ⁵⁴ Li paak ki u ji din ki

somm paanu ni Juu teeb tinj ni, njaan tan yaat saan doo nba ki bi yi Efraim, ki li kpia kunkoouk na; ki nɔɔ nan u poorpoweiteeb ji be leŋ.

⁵⁵ Tɔn, ki Juu teeb yukitgar tiaru jaamm tan per, ki niib bonchiann nyii digbana ki baar Jerusalem, a bin daa namm bi mɔŋa, ki fit lian teen siir ki di jaamm na. ⁵⁶ Ki niib na nba tikir Yenjiantu nasaakak ni yoo nba, ki bi loon Yiisa ki boi bi leeb a, “I dukii nlee? U kan baar jaamm na-a?” ⁵⁷ Ki mannteeb yudamm nan Farisiinba na tur mɔb a, “Wunba mi u boor, wun baar ki tan njaamat taar ki tin sooro.”

12

Meeri nba din but tulaarii Yiisa taa paak bianjinba

(Matiu 26.6-13; Mak 14.3-9)

¹ Tɔn, daa njanloob din biar nan yukitgar tiaru jaamm n di, ki Yiisa nan u poorpoweiteeb saan Betani, doo nba ki Lasarus be na. Nɔɔe ki Yiisa din fiino kuun ni na. ² Leŋe ki bi din teen jeet, ki Maata jii baar nann ki tan turib; Lasarus din pukin binba kar nan Yiisa ki di na ni. ³ Ki Meeri jii tulaarii saama, linba daauk paar bonchiann, ki bi yir naad na, ki but Yiisa taapant paak, njaan soor u mɔŋ yut ki fiar fiar; ki njaak na ji nubir tulaarii na gbimm. ⁴ Ki Yiisa poorpoweiteyeno nba ki bi yiu Judas Iskariot, (nɔɔe din tee wunba yaa wun nyi Yiisa poor na,) yet a ⁵ “Bee teen ki bi bo ki kɔi tulaarii manj salimpeena* kobii nantaa ki jii li likirii ki tur talasdammi?” ⁶ Waa din yet

* **12:5** 12.5 Salimpeenn din tee daar paauko.

nna man, li din ki tee a u baka be talasdamm na ni kaa, n̄aan u din tee nanyukœ. N̄œœ din tee wunba dia likirii pakir ki tuu jaan. ⁷ Ki Yiisa yetœ a, “N̄aantœ! U teen nna ki guun n piinu daare. ⁸ Talasdamm sii yœœ be nani yoo kura, n̄aan min narin kii yœœ be nani kaa.”

Mannteeb yudamm nba lor a bin kpi Lasarus bianjinba

⁹ N̄anne ki Juu teeb bonchiann gbat a Yiisa be Betani, ki bi saan leŋ. Bi din ki saan Yiisa kuukœœ paak kaa, n̄aan bi din loon bin saa la Lasarus-e mun, wunba ki Yiisa fiinœ kuun ni na. ¹⁰ Li paake ki mannteeb yudamm din lorin a bin kpi Lasarus mun biak. ¹¹ Li din tee Lasarus kuun fiiru paake ki Juu teeb bonchiann nyik mannteeb yudamm man, n̄aan teen Yiisa yada, ki waau.

Yiisa nba baat Jerusalem ki bi dontiroœ bianjinba (Matiu 21.1-11; Mak 11.1-11; Luk 19.28-40)

¹² Li yent sanyiœko ki nibur nba baar Jerusalem a bin di yukitgar tiaru jaamm na gbat a Yiisa baat. ¹³ Ki bi ji ŋat biabfaat ki che a bin tookœ, ki yikin sanpaapowa a, “Hosaana,[†] Piisin-ii be wunba baat Yennu sann ni na paak. Yennu n teen piisin timm Israel teeb‡ kpanbar paak.”

¹⁴ Yiisa poŋ din te ki bi lon boŋewa, ki u jak ki baat, nan laa sob Yennu gbouŋ ni bianjinba na a: ¹⁵ “Sayœnn doo teeb, i daa tiin janmaanii. Gotir, i kpanbar jak bonpaaje ki baat.”

[†] **12:13** 12.13 Hosaana paak tee “tintit.” [‡] **12:13** 12.13 Juu teeb sanleere tee Israel teeb.

¹⁶ Ki u poorpoweiteeb daa ki bann linba na paak li yoo maŋi. Naan Yennu nba din tan donn Yiisa sanpaapo na, ŋanne ki bi ji tiar nan linba na sob Yennu gbouŋ ni ki jiin u po, ki bia tiar nan niib na mun set din teeno nnae.

¹⁷ Nibur nba din be Yiisa boor Betani doo, yoo nba ki u yiin Lasarus a wun nyi kaauk ni, ki fiino kuun ni na, din la ki moont li barii. ¹⁸ Li paak, niib bonchiann din cheto, kimaan baa gbat ki u tun toonjaann maŋ na. ¹⁹ Naanne ki Farisiinba na yeen bi leeb a, “Ti ji kan fit teen siari. Gotir, tingbouŋ na niib kura waaue.”

Bianjinba ki Griik nisiab loon bin la Yiisa

²⁰ Niib nba din saan Jerusalem a bin saa di yukitgar tiaru jaamm na, Griik siab din be bi ni; ²¹ ki bi tan saan Filip peŋ, wunba nyii Bef-saida nba be Galilii yent ni na; ki yeto a, “Chanbaa, ti loon ki ti la Yiisa-e.” ²² Ki Filip mun saan ki saa bet Andru, ki Andru nan Filip ji saan ki bet Yiisa. ²³ Ki Yiisa betib a, “Yoo nba ki Yennu saa donn Nisaarik Bik na sanpaapo na baara. ²⁴ Barmoniie ki n beeri na, li-i tee ki bi bur dibinn tin ni, li tuu piae, naan ki kpensook na n kpo. Li poorpo ki dib na n kpaat, naanne ji tuu te ki lin nan dii bonchiann. Naan li-i tee ki bi ki bur dibinn maŋ, li kan kpo, ki bia kan nan; li sii yoo tee dibinyenne. ²⁵ Ton, daano nba loon u manfoor ki gar waa loon min Yiisa bianjinba, u saa koŋ u manfoore; naan daano nba loonin ki gar waa loon u manfoor bianjinba tingbouŋ na ni, hoce kan boon u manfoori; li tan sii tee manfoor nba kaa gbennue. ²⁶ Daano nba loon wuu tuun n

toonn, see ki u waan, ki maa tan sii be siaminba, ki n toontunno mun tan sii be lej. Ki bia jenna, daano nba tuun n toonn, n Baa Yennu tan saa donnowa.”

Yiisa nba pak u kuun po bianjinba

²⁷ Nanne ki Yiisa yet a, “N mok parbiir bonchiann, ki ki mi maa saa teen bianjinba. N nok boi n Baa Yennu ki wun nyinnin biak nba baat n paak na ni-i?” Nnaan bia yaa, “Aaii, kimaan n baar tingbouj na ni maa n tan di biak mane,”
²⁸ nnaan miar Yennu a, “N Baa, naant ki a sann n la dontir.” Nanne ki kunkor pak sanpaapo a, “N sann poj la dontira, ki bia saa namm la dontir ki pukin.”

²⁹ Niib bonchiann nba din see lej na din gbat kunkor nba pak sanpaapo na, ki siab yaa, “Li tee satianiie,” ki leeb yaa, “Malakae pak nano.”
³⁰ Nnaan ki Yiisa betib a, “Li ki tee n mon paak kaa ki kunkor na paki, nnaan li tee i paake. ³¹ Yoo nba ki Yennu yaa wun tan bu tingbouj na naateeb buut na, li yoo baat; ki u bia saa biir tingbouj na yudaano Sintaanii pan. ³² Bi-i taji jii-n ki donnin sanpaapo yoo nba, n saa dak niib kur ki bin baar n pej.” ³³ U maan na din want waa tan saa kpo bianjinbae. ³⁴ Ki nibur na yeto a, “Yennu gbouj wantit a u niganntoo Masia na sii mok manfoor nba kaa gbennue. Bee ki a yet a bi saa jii Nisaarik Bik na ki donno? Nmee tee Nisaarik Bik manj?” ³⁵ Ki u jiin a, “Min nba tee yentu na sii be i boor waaminnae. Li paak, ii somm man yentu manj ni, laa daa be na, ki bunbonn daa baati, kimaan wunba somm bunbonn ni, u

ki mi waa saa siaminba po. ³⁶ Tɔn, min nba tee yentu na nba daa be na, teentin yada, ki i sii tee niib nba ki n yentu sii yentiri ni.”

Juu teeb nba ki teen yada bianjinba

Yiisa nba din yet nna maɲ poorpoe ki u nyii niib na ni, ki saan boɾ. ³⁷ U lek din tun toonjaana bonchiann bi numm ni, ɲaan bi ki teenɔ yada. ³⁸ Baa din ki teenɔ yada na, ɲanne te ki Yennu sokinii maan na ji fit gbee a:

“Ti Yomdaano, ɲmee gaar ti maami?
Nɲmee ki Yennu fiit u paɲ ki wannɔ?”

³⁹ Bi din ki fit teenɔ yada kimaan Yennu sokinii Aisaya mun bia yet a:

⁴⁰ “Min Yennu-e teemm joonii, ki bia te ki bi gbar bannu,
a bi numpo daa yentiri, ki bi bia daa bant li paaki,
li paak, bi kan fit baar n boor, ki n te ki bin la laafia.”

⁴¹ Aisaya din yet nna, kimaan u din la Yiisa yentchiɔɲu, ki pak jiin u po.

⁴² Tɔn, Juu teeb yudamm gbaa bonchiann din teen Yiisa yadawa, ɲaan bi ki nyinn bi maɲ paanu, kimaan bi tiin janmaanii a Farisiinba na saa nyinnib bi Yenjiantu ni. ⁴³ Linba na wann nan Juu teeb yudamm maɲ din loon niib n pakibe, ki gar Yennu n pakib.

Bianjinba ki Yiisa mɔbona saa bu niib buut

⁴⁴ Nanne ki Yiisa tan pak sanpaapowa a, “Daano nba teenin yada, u ki teen min koo kaa yada, ɲaan u teen Yennu nba tumin nae yada.

⁴⁵ Ki bia jenna, wunba laatin, u ki laat min koo

kaa, n̄aan u laat Yennu nba tumin nae mun. ⁴⁶ N baar tingbounj na ni a mii tee yentue ki tur niib, ki daanɔ nba teenin yada, u kan biar bunbɔnn ni. ⁴⁷ Ki bia jenna, wunba gbat n maan na, n̄aan ki saki, min kaa saa bu u buut, kimaan n ki baar tingbounj na ni a man bu niib buut kaa, n̄aan n baar man tinnibe. ⁴⁸ Ki wunba yêenin ki ki saak n maan na, barbuuro be ki saa bu u buut; maan nba ki n pak ki u ki sak nae tan saa bu nanɔ durinya gbennu daar. ⁴⁹ Ki bia jenna, maan nba ki n pak na, li ki tee n tiɔn maan kaa, n̄aan maa pak linba manj, li tee n Baa Yennu nba tumin nae betin a mii want. ⁵⁰ Ki u maan manj teen niib manfoor nba kaa gbennu. Maa pak linba na, n̄anne ki n Baa Yennu yaa n pak.”

13

Sikin-n-mɔn labaar

¹ Yoo nba ki yukitgar tiaru jaamm daa ki piin na, n̄aan ki Yiisa mi nan u yoo baara, ki u saa nyi tingbounj na ni, ki n̄mat u Baa pej. U din loon u tiɔn poorpoweiteeb nba be tingbounj na ni na, ki ji yaa wun wannib bianjinba ki u mantik loomm.

² Li yoo na ki n̄ɔɔ nan u poorpoweiteeb di jeet; ki Sintanii ponj dɔn te ki Judas Iskariot nba tee Simonn bija na dukin a wun nyi Yiisa poora.

³ N̄aan Yiisa n̄arin din mi nan u Baa Yennu teen bont kur n̄ɔɔ Yiisa nuu niwa, ki bia mi nan u nyii u Baa Yennu boore, ki saa n̄mat u peja. ⁴ N̄anne ki u fiir jeet na paak, ki liat u liatir ki bir, n̄aan jii ninfiarj, ki gbab siak ni, ⁵ ki jii nyun ki wat teen tatilaauk ni, ki piin wu u poorpoweiteeb taapant,

ɲaan tuu soor ninfiarɲ nba ki u ghab na ki fiar,
⁶ ki tan baar Simonn Piita boor. Ki Piita boio a,
 “N Yomdaano, a yaa a wuur n taapante-e?” ⁷ Ki
 Yiisa jiino a, “Motana, a daa ki bann maa tuun
 linba na paaki, ɲaan li poor po, a saa banna.” ⁸ Ki
 Piita beto a, “Min ɲarin, a kan wuur n taapant
 faba.” Ki Yiisa beto a, “Mi-i kii wuur a taapant, a
 ji kan mi teen n yoo.” ⁹ ɲanne ki Simonn Piita ji
 beto a, “N Yomdaano, daa wu n taapant koo kaa,
 ɲaan wuut n nii nan n yur.” ¹⁰ Ki Yiisa beto a,
 “Daano nba poɲ wur, li yoo ji ki mok jakinti. Li
 paak, li ki kpaas talas wun ɲamm wuri, see wun
 wuur u taapante. I kura ji ki mok jakinti, ɲaan
 yenokooe mok jakint.” ¹¹ Yiisa poɲ din mi wunba
 saa nyi u poor na. Li paake ki u din yet a, “I kura
 ji ki mok jakinti, ɲaan yenokooe mok jakint.”

¹² Yiisa nba wuur bi taapant ki gbenn yoo nba,
 ki u ji jii u liatir na ki lia, ki jen kar jeet na boor,
 ɲaan boib a, “I mi maa tun linba ki turi na paaki-
 i? ¹³ I yi-n Wanntooe, nan i Yomdaano. Li set ɲan
 nan yaa yi-n bianɲinba na, kimaan n set tee nnae.
¹⁴ Ton, ki min nba tee i Yomdaano nan i Wanntoo,
 ɲaan tan wuur i taapant na, li mun ɲan ki yii wu
 i leeb taapant; ¹⁵ kimaan n wannii nyinne na; ii
 mun-ii tuun nna man nan maa tun bianɲinba ki
 turi na. ¹⁶ Barmoniie ki n beeri na, daabir ki chee
 u daano, ki toomu mun ki chee wunba tumo na.
¹⁷ Motana i ji mi linba na, ki li-i tee ki i tuun nna,
 parpeenn tee i yare.

*Bianɲinba ki Yiisa yet a soo saa nyi u poor
 (Matu 26.20-25; Mak 14.17-21; Luk 22.21-23)*

18 “N ki piak i kura po kaa. N mi yimm nba ki n ganni na para ni. Li sob Yennu gbounj ni a ‘Daano nba ki min nan hoo lakin di na, hoo nyii n poor.’ See ki sobu na fabir gbee nan monii. 19 N beeri labaar manje motana na, ki li set tan saa teen, ki li-i taji tun gbenn yoo nba, yin teen yada nan n set tee maa tee wunbae.

20 “Barmoniie ki n beeri na, daano nba gaar n toomu, u gaar mine, ki wunba gaarin, u gaar Yennu nba tumin nae mun.”

21 Yiisa nba yet nna poorpoe, ki parbiir baaro bonchiann; ki u betib a, “Barmoniie ki n beeri na, i ni yeno yaa wun nyi n poore.” 22 Ki li nmat bi yan nan waa yeen wunbaie; ki bi jiantir gorii leeb. 23 Ki bi ni yeno nba ki Yiisa mantik loono na kar kpiau. 24 Ki Simonn Piita kabinto, ki beto a, “Boimo ki laan u yeen nmapoe.” 25 Ki u poorpoweitoo man donn nakino, ki boio a, “N Yomdaano, li tee nmee?” 26 Ki Yiisa jiin a, “Mi-i taji nmit boroboro ki suk kpint ki tur wunba, yin bann nan li yooe na.” Nanne ki u nmit boroboro na ki suk kpint ki jii tur Judas nba tee Simonn Iskariot bija na.

27 Judas nba gaar boroboro man yoo nba, ki Sintaanii koo u ni. Ki Yiisa ji beto a, “Teent faa yaa a teen linba na yian.” 28 Nnaan bi soo din ki bann linba ki Yiisa pako na paaki. 29 Kimaan Judas nba din tuu dia likirii pakir na, ki bi siab mi a Yiisa tumo a wun saan daa jaamm na jeete, koo u beto a wun saan tur talasdamme likirii. 30 Judas nba din gaar boroboro na, li tonton na ki u fir nyii. Li din tee nyioko.

Ki jiin Yiisa dontir na po

³¹ Judas nba din nyii na poorpo, ki Yiisa bet u poorpoweiteeb a, “Mɔtanae ki min Nisaarik Bik saa la dontir, ki n nie Yennu mun saa la dontir.

³² Li-i tee ki Yennu la dontir n ni, li kan yukiri ki u mun saa te ki min Nisaarik Bik n la dontir u ni.

³³ “N waas, n ji kan yukir nani bonchianni. I tan saa lomin, ɲaan kan lami, nan maa bet Juu teeb yudamm bianjinba na, n bia beeri ɲanne na, a i kan fit baar siaminba ki n saa na.

Ki jiin Yiisa sennpaann na po

³⁴ “Mɔtana, n teeni sennpaanne: a ii loon i leeb. Maa looni bianjinba na, ii muni loon i leeb nna. ³⁵ Li-i tee ki i loon i leeb, soɔ kur saa bann nan i tee n poorpoweiteebe.”

Yiisa nba yet a Piita saa nɔi a u ki miu bianjinba (Matiu 26.31-35; Mak 14.27-31; Luk 22.31-34)

³⁶ ɲanne ki Simonn Piita boio a, “N Yomdaano, a yaa a tan saan lee?” Ki Yiisa jiin a, “Maa saa siaminba, i kan fit wei mɔtana, ɲaan li poorpo i saa weina.” ³⁷ Ki Piita bia boio a, “N Yomdaano, bee teen ki n kan fit weia mɔtana? Min ɲarin ponj teen siir nan ki n gaar a paak ki kpowa.”

³⁸ Ki Yiisa boio a, “A set teen siir nan monii nan ki a gaar n paak ki kpo-o? Barmoniie ki n beera na, kojouk daa kan bui kaawa, ki a saa nɔi taar muntaa a a ki mimi.”

14

Yiisa nba yaa ɲooɛ tee sonu bianjinba

1 Yiisa din betib a, "I daa mok parbiiri. Teent Yennu yada, ki mun teenin yada. 2 Diit bonchiann be n Baa Yennu nyaak, ki n kun maa n saa teen i diit siir. Li-i bonni kii tee barmonii, n bo kan betini. 3 Ki mi-i kun ki saa teen diit na siir ki gbenn, n bia saa jenna ki tan jii-i, ki i tan sii be siaminba ki n be na. 4 Ki bia jenna, i pon mi maa saa siaminba, ki bia mi sonu nba saa lej." 5 Ki Tomas boio a, "N Yomdaano, ti ki mi faa saa siami. Nlee ki ti saa bann sonu nba ki ti saa saan leji?" 6 Ki Yiisa beto a, "Mine tee sonu na, ki bia tee mamomm, ki bia tee manfoor. Soo kaa ki saa baar n Baa Yennu boor, ki li ki tee ki u sint baarimi. 7 Li-i bonni tee ki i min, i bia bo sii mi n Baa nawa; nyaan laa nyii motana ki saa, i ji miu ki bia laato."

8 Ki Filip yeto a, "N Yomdaano, wantit a Baa man, taa loon linba kure na." 9 Ki Yiisa jiiin a, "Filip, n pon be nani ki li yukira, nyaan ki a daa ki bannimi-i? Wunba lan, u set la n Baa mane na. Ki bee ki a yaa n wannin n Baa manji? 10 N be n Baa nie, ki n Baa mun be n ni; i ki teen linba na yada-a? Maan nba ki n pak ki turi na, li ki nyii n ni kaa, nyaan li nyii n Baa Yennu boore. Njooe be n ni ki tuun u toona man. 11 Li paak, teentin yada nan n be n Baa Yennu ni, ki n Baa Yennu mun be n ni. Li-i kii tee nna biaki, yin teen bakitnaun toona nba ki n tuu tuun na yada.

12 "Barmoniie ki n beeri na, daano nba teenin yada, u sii tuun toonjaana nan maa tuun bianinba nae, ki u toonjaana man gbaa saa gar n yara, kimaan n saa n Baa Yennu boore. 13 Ki linba kur ki i sii mei n sann ni, n saa tuma, ki

ηοο Yennu n la dontir n paak. ¹⁴ Ki li-i tee ki i miar* linba kur po n sann ni, n saa tuma.

Yennu Seyeen baaru labaar

¹⁵ “Li-i tee ki i loonin, i sii saak n mɔb, ¹⁶⁻¹⁷ ki n saa miar n Baa Yennu, ki u saa turi Sommtoloo. Njooe tee u Seyeen nba want barmonii wannu, ki sii be nani yoo nba kaa gbennu. Ki tingboun na njaateeb kan fit gaarɔ, kimaan bi ki miu, ki bia ki mi nan u be. Njaan yimm ηarin miu, kimaan u be nani, ki bia sii yoo be i ni.

¹⁸ “Mi-i tanji yaat saan, njaan n kan nyiki yann ki soo ki goriini, kimaan n saa jen i peη na. ¹⁹ Ki li-i yann waaminna, tingboun na njaateeb ji kan lami, njaan yimm ηarin bia saa lama. Tɔn, maa saa jen n manfoor ni na, i mun tan saa jen i manfoa niwa. ²⁰ Ki bia jenna, mi-i tanji jen n manfoor ni yoo nba, i saa bann nan n be n Baa Yennu nie, ki i mun bia be n ni, ki n mun be i ni.

²¹ “Daano nba bant n sennii ki bia saakir, li daano loonin. N Baa Yennu sii loon ηooe, ki n mun sii loono, ki saa fiit n mɔη ki wannɔ.”

²² Ki Judas, (wunba ki tee Judas Iskariot na) boio a, “N Yomdaano, bee teen ki a saa fiit a mɔη ki wannit, njaan kan fiit a mɔη ki wann tingboun na njaateebi?” ²³ Ki Yiisa jiin a, “Daano nba loonin, u sii saak n maan, ki n Baa Yennu sii loono, ki min nan n Baa Yennu saa baar u boor ki sii yoo be u ni. ²⁴ Njaan daano nba ki loonin, u ki saak n maami, ki yaa gbat maan nba na, li ki tee n yar kaa, njaan li tee n Baa Yennu nba tumin na yare.

* **14:14** 14.14 “Miar:” Siab kpintu tee “miarin.”

²⁵ “Maa daa be nani nae ki n beeri maan nba na. ²⁶ Naaan n Baa Yennu saa tun Sommtɔɔ i boor, n sann ni. Li Sommtɔɔe tee u Seyeen na; ɲɔɔe saa wannii barii kur, ki bia saa tiari linba kur ki n ponj beti.

²⁷ “Mi-i yaa n saan, n saa pi-i piinii nba tee n parmaasir na. Li ki tee tingboun na parmaasir na booru kaa. I daa mɔk parbiiri. I bia daa tiin janmaanii. ²⁸ I ponj gbat ki n yeti a ‘N nyikitie, ɲaan n bia saa jen i boor niwa.’ I-i set kii loonimie, i sii mɔk parpeenn nan maa saa n Baa Yennu boor na, kimaan u cheen.

²⁹ “N daa beeri linba tan saa tume, ki yoo nba ki li tan tumi, yin teen yada. ³⁰ N kan pak nani ki yukiri, kimaan tingboun na yudaano Sintaanii baat, ɲaan u ki mɔk n yaaki. ³¹ N loon tingboun na teebe n bann nan n loon n Baa Yennu nan mɔnii; li paake teen ki n tuu tuun linba ki u betin a n tun.

“Naant ki tin fir yaat man.”

15

Tilontik barjouk

¹ Yiisa din yet a, “Mine tee tilontik nan mɔnii, ki n Baa Yennu tee li ɲammtɔɔ; ² ki u tuu chɔɔ yiinu nba kur gaa n paak ɲaan ki loon loona nae. Naaan yiinu nba kur ɲarin loon loona, u tuu gbat gbate, ki lin ɲamm lon loona bonchiann. ³ Mɔtana, yimme tee niɲamm, maan nba ki n pak ki turi na paak. ⁴ Ii gaa n paak man, ki n sii be i ni. Yiinu kan fit lon loona, see ki u gaa tiik paak. Li mun bia tee nnae, i kan fit lon loona, see ki i gaa n paak.

⁵ “Mine tee tilontik man, ki i tee li yiinii. Wunba gaa n paak, ki n mun be u ni, ḡoḡe sii loon loona bonchiann, kimaan mi-i kaa i ni, i kan fit tun siari. ⁶ Ki jenna, wunba ki yoo gaa n paaki, Yennu saa chooue ki lu, nan baa tuu choo yiinu ki lu ki lin koor na. Li yiinboorue ki bi tuu tikir ki joor muu. ⁷ Ki bia jenna, li-i tee ki i yoo gaa n paak, ki n maan na be i ni, miat Yennu linba kur ki i loon, ki i saa lawa. ⁸ Li-i tee ki i loon loona bonchiann, ḡanne saa wann nan i set tee n poorpoweiteeb nan barmonii, ki n Baa Yennu saa la dontir.

⁹ “N Baa Yennu nba loonin bianjinba na, n mun looni li bianje. Ii be n lomm ni man. ¹⁰ Li-i tee ki i saak n mɔb, i sii be n lomm nie nan maa saak n Baa Yennu mɔb, ki be u lomm ni na.

Leeb lomm labaar

¹¹ “N pak na ki turi a n parpeenn na boorue-ii be i ni, ki yin gbee nan parpeenn. ¹² Nae tee n sennu ki n senn turi, maa yii loon i leeb nan maa looni bianjinba na. ¹³ Lonjaansiar kaa ki gar nirɔ n sak gaar u yooḡnba paak ki kpo.

¹⁴ “Li-i tee ki i tuun maa beti linba na, i tee n yooḡnbae. ¹⁵ N ji kan yiini daaba, kimaan daabir ki mi u yomdaano dudukiti. Maa yi-i n yooḡnba na, kimaan labaar kur nba ki n gbat n Baa Yennu boor, ḡanne ki n wann. ¹⁶ Yimm kaa gannimi, ḡaan mine ganni, ki turi toona maa yii saa kii loon loona bonchiann, loona nba sii be mɔkmɔk nan mɔkmɔk, a n Baa Yennu n turi linba kur ki i miarɔ n sann ni. ¹⁷ Linba nae ki n senni, maa yii loon i leeb.

Tingboun na n̄aateeb nan labaar

¹⁸ “Tɔn, li-i tanj tee ki tingboun na n̄aateeb nami, yin bann nan bi poŋ nan minewa. ¹⁹ Li-i bonni tee ki i tee tingboun na n̄aateebie, tingboun na n̄aateeb bo sii looni nan baa loon bi moŋ niib bianjinba nae. N̄aan n ganni ki nyinni tingboun na niib niwa, ki i ji ki tee tingboun na n̄aateeb yabi; li paake teen ki bi nami. ²⁰ Ii tian maan nba ki n paki na man, a ‘Daabir kaa ki chee u yomdaano.’ Tɔn, bi-i mukisin, bi mun saa mukisiwa; ki bi-i saak n maan, bi mun bia saa sak i maama. ²¹ Bi set saa mukisiwa, kimaan yaa tee n yab na, ki jenna, baa ki mi Yennu nba tumin na paak.

²² “Mi-i diŋj kii baar ki tan pak turibi, bi bo kii mɔk biiti. N̄aan maa sat baar pak turib na, sonsau ji kaa ki bi saa fit bɔr bi biiti. ²³ N̄aan wunba namin, u nan n Baa Yennu-e mun. ²⁴ Mi-i bonni kii tuun toonjaana nba ki soɔ daa ki mi tun na bi boori, bi bia bo kii mɔk biiti. Bi lek la toonjaana nba ki n tuu tuun nawa, n̄aan nan min nan n Baa Yennu. ²⁵ Linba na teen nnae, a baa din sob linba n po bi sennu ni na n fit teen monii a: ‘Bi namin, ki li ki mɔk paaki.’

²⁶ “Tɔn, n saa tun Sommtɔɔ i peŋ, wunba tee Yennu Seyeen ki want barmɔnii wannu na. U saa nyi n Baa Yennu boore ki baar i peŋ, ki pak n po. ²⁷ Ki i moŋ moŋ sii piak n po ki teen niib, kimaan i poŋ yoɔ be nanime, laa nyii yoo nba ki n din piin ki tuun n toonn nawa.

16

¹ “N poŋ mi paki mukisuk na poewa, a i tan daa

nyikit n weiu. ² Bi tan saa yoo nyinni Yenjiantu ni. Ki yoo baat ki wunba tan kpi-i, u sii mi a u tuun nna ki teen Yennu-e. ³ Bi tan saa tun linba na ki turiwa, kimaan bi ki mimi, ki bia ki mi n Baa. ⁴ Naan n beeri linba na motana, a li yoo-i taji baar, i ji saa tiar maan nba ki n paki na.

Ki jiin Yennu Seyeej toona po

“N din ki beti linba na sinsinni, kimaan min nan yimme tuu be. ⁵ Motana n saa Yennu nba tumin na peje. Naan i soo ki boin ki laan n saa lee. ⁶ Ki maa ji beti linba motana na, ki i mok parbiir bonchiann. ⁷ N beeri barmoniiie nan li sii nan turi nan ki n yaat saan, kimaan mi-i kii saani, Sommtoo na kan baar i peji. Naan mi-i taji saan, n saa tumo i pej na.

⁸ “Wuu taji baar yoo nba, u saa wann tingbouj na naateeb a bi mok biit. U bia saa wannib yentinu nba tee bianjinba, ki bia wannib Yennu barbuut nba tan sii tee bianjinba. ⁹ U saa wannib a bi mok biit, kimaan bi ki teenin yada. ¹⁰ Ki jenna, u saa wannib yentinu nba tee bianjinba, kimaan n saa saan n Baa Yennu boor, ki i ji kan lami. ¹¹ Ki bia jenna, u saa wannib Yennu barbuut nba tan sii tee bianjinba, kimaan u poj bu tingbouj na teeb yudaano Sintaanii buut ki biirowa.

¹² “Maan be bonchiann ki n bo saa paki, naan i kan fit gaar motana. ¹³ Yennu Seyeej nba want barmonii na, wuu taji baar yoo nba, u saa wanni barmonii kura. U tan kii piak u mon mon maan kaa, naan u tan sii wanti linba ki u gbia Yennu boore, ki bia sii beeri linba tan saa teene. ¹⁴ Ki jenna, u bia tan sii dont n sann, kimaan u tan sii

jikit n labaare ki fiitir ki wanti. ¹⁵ Linba kur ki n Baa Yennu mək, li tee n yare. Li paake teen ki n yet a Yennu Seyeenj sii jikit n labaar ki wanti.

Ki jiin parbiir nan parpeenn po

¹⁶ “Li-i yann waaminna, i ji kan lami, njaan li-i biaki yann waaminna, i saa lama.” ¹⁷ Ki u poorpoweitesiab boi bi leeb a, “Linba na paak tee bee? U yaa li-i yann waaminna, ti kan lau, a njaan li-i biaki yann waaminna, ti saa lauwa, ki bia yaa, kimaan u saa u Baa peje. ¹⁸ ‘Li-i yann waaminna’ paak tee bee? Ti ki bann waa piak linba na paaki.”

¹⁹ Ki Yiisa bann nan bi yaa bin boio buboite. Li paake ki u boib a, “Maa yaa li-i yann waaminna, i kan lami, ki bia yaa li-i bia yann waaminna, i saa lama na, i boi i leeb a yin bann li paake-e? ²⁰ Barmoniie ki n beeri na, i tan sii mō fabin, njaan tingbounj na njaateeb narin tan sii mək parpeenne. I sii mək parbiir, njaan li poorpo ki i parbiir manj saa tunn ki teen parpeenn.

²¹ “Li tee nan poo nba tuu yaa wun mar, ki mək parbiir nae, kimaan u biak yoo baara, njaan wuu tanj mar bik yoo nba, u ji tuu tamm u biak na poe, ki ji mək parpeenn nan waa mar bik tingbounj ni na paak. ²² Li tan sii tee i mun nnae; motana yaa mək parbiir na, njaan n bia tan saa laiwa, ki i para tan saa penn bonchiann, ki soo kaa ki tan saa nyinn parpeenn manj i ni.

²³ “Li yoo-i tanj baar, i tan kan boin buboiti. Barmoniie ki n beeri na, linba kur ki i miar n Baa Yennu n sann ni, u saa turiwa. ²⁴ Njaan nan

mɔtana, i daa ki mi miarɔ bonsiar n sann ni. Ii miarɔ, ki i saa la, ki gbee nan parpeenn.

Linba tan saa baar labaar

²⁵ “N poŋ tuu yiini barjokite. Yoo baat ki n ji kii yiini barjokiti, ŋaan n tan sii piak ki yentir i numm poe ki jiin n Baa Yennu po. ²⁶ Li yoo-i tanj baar, i tuu saa miarɔ n sann ni. Li bia tan kan kpa a talas nan ki n gaar i paak ki miarɔ ki turini, ²⁷ kimaan n Baa Yennu mɔŋ mɔŋ looni; waa looni linba paak tee nnae, kimaan yaa loonin ki bia teen yada nan n nyii n Baa maŋ boore na. ²⁸ N din nyii n Baa maŋ peŋe ki baar tingboun na ni, ki mɔtana n ji nyikit tingboun maŋe na, ŋaan ŋmat u peŋ.”

²⁹ Ŋanne ki u poorpoweiteeb na yetɔ a, “Mɔtana a ji kpan piak yentir ti numm poe. A ki yiint barjokit kaa. ³⁰ Mɔtana ti ji bann nan a mi bonsiar kur, ki poŋ bia mi ti buboit ŋaan ki ti daa ki boia. Li paake ki ti teen yada nan a nyii Yennu peŋe.” ³¹ Ki Yiisa boib a, “I ji teenin yada mɔtanawa-a? ³² Yoo baat, ki poŋ baar gbenna, ki i kur tan saa yat kun, ŋaan ki n biar n kuukɔɔ. Ŋaan li set ki tee n tan sii be n kuukɔɔ kaa, kimaan min nan n Baa Yennu-e tan sii be. ³³ N beti biak na baaru po a yin tan fit la parmaasire, kimaan yaa gaa n paak na. I tan saa di biak tingboun na ni. Ŋaan yii mɔk parcheenn man, kimaan n nyann tingboun nawa.”

17

Yiisa nba miar Yennu bianjinba

¹ Yiisa nba din pak nna maŋ, ŋaan gokit got sanpaapo, ki yet a, “N Baa, yoo maŋ baara. Ŋaant ki min a Bija n la dontir, ki lian te ki a mun la dontir, ² kimaan fine turin yiikoo niib kur paak, a man fit tur niib kur nba ki a turin maŋ manfoor nba kaa gbennu. ³ Ki manfoor maŋe tee niib n bann fin nba tee Yennu nan barmonii, ki soo ji kaa; ki bia mun saa bann min Yiisa Masia nba ki a tumin na. ⁴ Toona nba ki a turin a n tun na, n tun gbenna, ki dont a sann tingbouŋ na ni. ⁵ N Baa, turimin dontir a boor mɔtana, dontbooru nba ki n din laat, maa din be a boor ki a daa ki nan durinya na.

⁶ “Niib nba ki a din gann ki turin na, n te ki bi bannawa. Bi din tee a yabe, ki a jiib ki turin, ki bi mun sak a maama. ⁷ Ki mɔtana bi mi nan bonsiar kur nba ki a turin na nyii a boore, ⁸ kimaan n pakib maan nba ki a turin nawa, ki bi mun gaara, ki mɔtana bi ji bann nan n set nyii a peŋe nan monii, ki bi teen yada nan fine tumin.

⁹ “Tɔn, mɔtana n ji meia bi paake. N ki meia tingbouŋ na niib kur paak kaa, ŋaan n meia binba ki a turin na paake, kimaan bi tee a yabe. ¹⁰ N yab kur tee a yabe; ki a yab kur mun tee n yab; ki bi dont n sann. ¹¹ Ki mɔtana n ji baat a boor nie na; n ji kii be tingbouŋ na ni, ŋaan ŋamm ŋarin daa saa biar tingbouŋ na niwa. Tɔn, n Baa, Popeendaanɔ, i diab fanu a sann ni, sann nba ki a din purin na, ki bin taan yomm nan min nan fin nba tee yomm na. ¹² Maa daa be namm na, n diab fanu nan a sann nba ki a din purin na ni. N baak bi paak, ki bi ni soo ki teen yanni, see wunba tee Sintaanii yoo na. Waa teen yann na,

li teen nan laa sɔb fin Yennu gbouŋ ni bianjinba nae. ¹³ Ki motana n baat a peŋe; ki maa daa be tingbouŋ na ni na, n piak linba nae ki teemm, a bi para n gbee nan parpeenn nba ki n mɔk na.

¹⁴ “N pak a maan na turiba. Li paak ki tingbouŋ na ŋaateeb namm, kimaan bi ki tee tingbouŋ na ni yabi, nan maa mun ki tee tingbouŋ na ni yoo na. ¹⁵ N ki meia maa a nyinnib tingbouŋ na ni kaa, ŋaan n meia maa fii baak bi paake fanu, ki bonbiiuk daano Sintaanii daa baat ki biiribi. ¹⁶ Maa ki tee tingbouŋ na yoo na, bi mun ki tee tingbouŋ na yabi.

¹⁷ “Wantib a maan nba set tee barmonii na, ki lin teemm popeendamm. ¹⁸ Faa din tumin tingbouŋ na ni bianjinba na, nnae ki n mun tumm tingbouŋ na ni. ¹⁹ Ki bi paake ki n jikit n mɔŋ ki teena na, a bin teen a tiɔŋ yab nan barmonii.

²⁰ “N ki meia ki teen ŋamm kuukoo kaa; n meia ki teen nan binba tan saa teenin yada bi mɔontii paak naewa. ²¹ N bia meia maa bi kura n taan mɔyomme. N Baa, faa be n ni, ki n mun be a ni bianjinba na, ŋaant ki bi mun n taan nant mɔyomm nna; ŋanne saa te ki tingbouŋ na ŋaateeb n teen yada nan fine tumin. ²² Popeenn binbeŋ nba ki a turin na, n mun turiba, ki bi saa taan mɔyomm, nan min nan fin nba taa mɔb bianjinba na. ²³ N be bi ni, ki a mun be n ni, a bin fit lian taan mɔb chib. ŋanne saa te ki tingbouŋ na ŋaateeb n bann nan fine tumin, ki bi saa bann nan a loonib nan faa loonin bianjinba na.

24 “N Baa, a jiib ki tur mine, ki n loon bii tanji be maa tan sii be siaminba, ki bin la faa dont n sann bianjinba, kimaan a din loonime, yoo nba ki a daa ki nan durinya na. 25 N Baa, Popeendaano, tingbounj na njaateeb narin ki miani, njan min narin mia, ki n poorpoweiteeb na mi nan fine tumin nna. 26 N fiit a binbenj ki wanniba, ki bia sii njammit fiitir a binbenj ki wantib, ki bii mok lomm nba ki a loonin na booru, ki n mun sii be bi ni.”

18

Baa soor Yiisa bianjinba

(Matiu 26.47-56; Mak 14.43-50; Luk 22.47-53)

1 Yiisa nba din miar Yennu ki gbenn na poorpo, ki njo nan u poorpoweiteeb yaat saa, ki saa poot kpenu nba ki bi yi Kidronn na. Kpaab nna din be lej; ki bi saan ko kpaab man ni.

2 Ton, Judas, wunba din nyii Yiisa poor na din mi kpaab man boor, kimaan yoo kur Yiisa din tuu saa nan u poorpoweiteeb leje. 3 Nanne ki Judas tan baar kpaab man ni nan kunkonkonna, nan mannteeb yudamm nan Farisiinba toontunna; ki bi dia jatiat nan fita nan mulanbaabii.

4 Yiisa narin din mi bonsiar kur nba yaa lin teeno, nanne ki u nyii toonn, ki boib a, “I loon nme?” 5 Ki bi jiin a, “Yiisa nba tee Nasaref niro na.” Ki u betib a, “Mine na.” Ki Judas, wunba nyii u poor na, see namm lej. 6 Yiisa nba narin yet a, “Mine na” yoo nba, ki bi nmat potuntuna, ki baa baa tinj ni. 7 Ki Yiisa namm boib a, “I loon nme?” Ki bi bia yet a, “Yiisa nba tee Nasaref niro na.” 8 Ki Yiisa betib a, “N ponj beti a mine

na. Li-i tee ki i loon minie, yin n̄aan ki binba be nanin na-ii saa.” ⁹ U din yet nna maŋ, a waa poŋ yet Yennu linba na n teen m̄oniie, a “Faa turin binba kur na, bi s̄oo ki teen yanni.”

¹⁰ Li yoo maŋ ki Simonn Piita dia jukbanjiak, ki n̄oot ch̄oo Yennu mannteeb yudaano daabir niidiitu po tubir ki pot. Daabir maŋ sann din tee Malkus-e. ¹¹ Ki Yiisa bet Piita a, “Jiint a jukbanjiak maŋ ki n̄oon. A mi a biak nba ki n Baa turin na, n kan di-i?”

*Baa jii Yiisa ki baar n̄ano Annas peŋ bianjinba
(Matiu 26.57-58; Mak 14.53-54; Luk 22.54)*

¹² N̄anne ki kunk̄onk̄onna nan bi yudaano nan Juu teeb yudamm toontunna na ji soor Yiisa, ki lor̄o, ¹³ ki jiiu ki saan n̄ano Annas boor sinsinn. Annas din tee Kayafas diamme, ki Kayafas tee Yennu mannteeb yudaano li binn. ¹⁴ Kayafas mane din bet Juu teeb yudamm a li n̄an ki niyen̄ok̄oo n gaar niib kur paak ki kpo, a n̄anne chee nan s̄oo kur n kpo.

*Piita nba din n̄oi a u ki mi Yiisa bianjinba
(Matiu 26.69-70; Mak 14.66-68; Luk 22.55-57)*

¹⁵ Baa din saa nan Yiisa na ki Simonn Piita nan Yiisa poorpoweitelōo waa; ki poorpoweitelōo maŋ tee daano nba ki mannteeb yudaano na miu fanu. Li paak, ki u baar k̄oo mannteeb yudaano na n̄aadindouŋ ni, siaminba ki Yiisa be na. ¹⁶ N̄aan ki Piita n̄arin biar see nanyer po yanir tamm̄ob ni, ki poorpoweitelōo nba ki mannteeb yudaano na miu na n̄mat yanir tamm̄ob na ni, ki pak nan sapaamo nba guu tamm̄ob na, ki u k̄oon Piita dindouŋ na ni. ¹⁷ Ki sapaamo maŋ boi Piita

a, “A ki tee joo na poorpoweiteyeno kaa-a?” Ki Piita jiino a, “Aaii! N ki tee u poorpoweiteyeno kaa.”¹⁸ Waat din be li yoo, ki toontunna na nan kunkonkonna na joo sankonna muu, ki see nanii, ki Piita tan saan taamm ki bi nanii.

Bianjinba ki mannteeb yudaano boi Yiisa buboit

(Matiu 26.59-66; Mak 14.55-64; Luk 22.66-71)

¹⁹ Nanne ki mannteeb yudaano na boi Yiisa u poorpoweiteeb nan u wannu na po. ²⁰ Ki Yiisa beto a, “N ponj tuu piak yeenin ni ki teen soo kur, ki ki bori n wannu kur nba ki n tuu wanti. N tuu want niib Yenjiantu diit ni nan Yenjiantu nasaakak ni, siaminba ki Juu teeb kur tuu baat lakint na. Min narin ki mi pak siar woonin ni. ²¹ Ki bee teen ki a boimi? Boin binba gbat linba ki n tuu beerib na. Njamme mi maa tuu yeen linba.” ²² Yiisa nba yet nna man, ki kunkonkonna na yeno pebo tanpak, naan boio a, “Bi piak jiint mannteeb yudaano nnae-e?” ²³ Ki Yiisa beto a, “Mi-i pak bonbisiarie, fan bet soo kur laa tee linba. Naan mi-i pak linba tokinie, bee teen ki a ji pebimi?”

²⁴ Li yooe ki Annas te ki bi jii Yiisa ki saan nano Kayafas, wunba tee mannteeb yudaano na pen; ki Yiisa bia lek daa lor nmiit.

Bianjinba ki Piita namm noi a u ki mi Yiisa

(Matiu 26.71-75; Mak 14.69-72; Luk 22.58-62)

²⁵ Piita nba din see ki nanii muu na, leŋ man ki bi boio a, “A ki tee u poorpoweiteyeno kaa-a?” Ki Piita yetib a, “N ki tee u poorpoweiteyeno kaa.”

²⁶ Ki mannteeb yudaano daabiyeno, wunba ninja

ki Piita choo u tubir ki pot na boio a, “N bo ki la ki a be nan Yiisa kpaab na ni-i?” ²⁷ Ki Piita bia noi. Li taakpaak ni ki kojouk bui.

Bianjinba ki Pailat bu Yiisa buut ki chab a bin kpiu

(Matiu 27.1-2, 11-14; Mak 15.1-5; Luk 23.1-5)

²⁸ Kayafas nba din boi Yiisa buboit ki gbenn na poorpoe, ki Juu teeb yudamm jiiu ki saan nanao tinj na yudaano nba ki bi yiu Pailat* na njaak. Li din tee sanyapob nie. Juu teeb yudamm manj din ki loon bin koo njaak† manj ni, kimaan bi loon bin dia bi mone bonjann Yennu boor, ki tan fit di yukitgar tiaru jaamm na. ²⁹ Li paak ki Pailat nyii nanyer bi boor, ki boib a, “Joo na teen bee ki i biiro?” ³⁰ Ki bi yaa, “Wuu bonni kii tun bonbiir, ti bo kan baar nanao a boori.” ³¹ Ki Pailat betib a, “I mon n jiiu ki bu nanao, i sennu nba want bianjinba.” Ki Juu teeb yudamm manj yaa, “Ti ki mok yaak ki saa kpi niro.” ³² Yiisa nba din yaa kubooru nba ki u tan saa kpo na, li set tan teen nnae, ki fit gbee.

³³ Ki Pailat nmat koo njaak na ni, njan yiin Yiisa, ki boio a, “A tee Juu teeb kpanbare-e?” ³⁴ Ki Yiisa jiin boio a, “Fine daa boin buboit na koo siabe beta n po?” ³⁵ Ki Pailat boio a, “N tee Juu niro-ee? A mon niib nan mannteeb yudamme jiia ki tan turin. A jia biir bee?” ³⁶ Ki Yiisa yeto a, “N naan ki tee tingbouj na ni yar kaa. N naam-i bonni tee tingbouj na ni yarie, n poorpoweiteeb

* **18:28** 18.28 Pailat din tee Rom tinj kpanbar Siisa yudamm yeno. † **18:28** 18.28 Bi-i koo wunba ki tee Juu niro njaak, li teemm jakinte.

bo saa kɔn n paaka, ki Juu teeb yudamm bo kan soorimi. Aaii, n naan ki tee tingbouŋ na ni naami.”

³⁷ Ki Pailat boio a, “A set tee kpanbare-e?” Ki Yiisa jiin a, “Nn, fine yet a n tee kpanbar. Bi din marin a n wann niib barmonii wannue. Li paake ki n baar tingbouŋ na ni; ki soo kur nba waa barmonii wannu maŋ gbia n maan.” ³⁸ Ki Pailat boio a, “Bee tee barmonii?” ŋaan ŋmat nyii nanyer, Juu teeb yudamm na boor ki betib a, “N ki la joo na biit ki saa biiro. ³⁹ I mɔk siar ki tuun binn kur ni, ki n tuu nyinn dansarkooyeno yukitgar tiaru jaamm yoo ki turi. I loon ki n nyinn Juu teeb kpanbar na ki turini-i?” ⁴⁰ Ki bi tian ki yeen a, “Ti ki loon joo na kaa. Ti loon ki a nyinn Barabas-e ki turit.” Barabas din tee fat-tooe.

19

¹ Li yoo na ki Pailat te ki bi boo Yiisa kpaasir. ² Ki kunkonkonna na luu kunkonii fokirik ki yirimɔ, ki lanno baanmuŋ nna, ³ ki baat u boor, ki yeen a, “Juu teeb kpanbar, ti foonta,” ŋaan pebito tanpakii.

⁴ Ŋanne ki Pailat bia ŋamm nyii nanyer ki bet yudamm na a, “Gotir man, n baat nana i boore, a yin bann nan n ki la u biiti.” ⁵ Ŋanne ki bi baar nan Yiisa, niib na boor, ki u yir kunkonii fokirik ki bia lia baanmuŋ na. Ki Pailat betib a, “Gotir, nirɔ maŋe na.”

⁶ Mannteeb yudamm nan bi toontunna nba lau yoo nba, ki bi tian a, “Kpaamo dapunpunn paak! Kpaamo dapunpunn paak!”

Ki Pailat betib a, “I mɔŋ n jiiu ki kpaau dapunpunn paak, kimaan min ki la u biiti.”

⁷ Ki Juu teeb yudamm na jiin a, “Ti mɔk sennsau, ki sennu maŋ want nan u kpan lek tee wun kpoe, kimaan u yaa u tee Yennu Bijae.”

⁸ Pailat nba gbat nna maŋ, ki jaŋmaanii ji sooro bonchiann; ⁹ ki u ŋmat koo ŋaan yiin Yiisa, ki tan boio a, “A nyii lee?” Ŋaan Yiisa din ki jiino siari. ¹⁰ Ki Pailat bia boio a, “A kan pak jiinimi-i? A ki mi nan n mɔk yiikoo ki saa te bin ŋaa-a, ki bia mɔk yiikoo ki saa te ki bin kpa-a dapunpunn paaki-i?” ¹¹ Ki Yiisa ji jiino a, “Yennu-i bonni kii chaba yiikoo, a bo kii mɔk n paak yiikoo. Li paak, daano nba soorin ki jiin kubina na, u biit yab ki gar a yara.”

¹² Pailat nba gbat nna maŋ, ki u lek ji loon ki wun ŋaa u nan ninmonn, ŋaan ki Juu teeb yudamm na yakii ki yaa, “Li-i tee ki a ŋaa u, ŋann a ji ki tee Kpanbar yudaano Siisa yook kaa, kimaan daano nba pur u mɔŋ kpanbar, u tee kpanbara yudaano na dataake.” ¹³ Pailat nba gbat nna, ki u nyii nan Yiisa nanyer po, ki kar u buut kaanu paak, ki bi yir Tann Binbintir. (Juu teeb maan ni, bi yir Gabata-e.)

¹⁴ Li din tee yonsuuk nie, ki li saa yent ki yukitgar tiaru jaamm n di. Ki Pailat yet Juu teeb yudamm na a, “I kpanbare na.” ¹⁵ Ki bi yakii ki yaa, “Kpimɔ! Kpimɔ! Kpaamɔ dapunpunn paak.”

Ki Pailat boib a, “I kpanbar ki i loon ki n kpaau dapunpunn paaki-i?”

Ki mannteeb yudamm na jiin a, “Ti ki mɔk kpanbarsɔɔ see kpanbar yudaano Siisa kuukoo.”

¹⁶ Ki Pailat ji chab a bin kpaa Yiisa dapunpunn paak.

Baa kpaa Yiisa ki tabinɔ dapunpunn paak bianjinba

(Matiu 27.32-44; Mak 15.21-32; Luk 23.26-43)

Nanne ki Rom teeb kunkonkonna na ji gaar Yiisa, ¹⁷ ki nyii nanɔ doo na kpinj; ki u jii u kuun dapunpunn. Ki bi saa baar siaminba ki bi yir “Yukpabuk” na. (Juu teeb maan ni, bi yi leje “Golgota.”) ¹⁸ Leje ki bi kpaau dapunpunn paak; ki bia kpaa niib banlee dapunpuna paak ki pukin Yiisa po, ki yeno be chianu ki loɔ mun be chianu, njan ki Yiisa be sinsuuk ni. ¹⁹ Ki Pailat sob sobinii ki bi tabin Yiisa dapunpunn na paak, ki li yaa, “Nasaref nirɔ Yiisa nba tee Juu teeb kpanbare na.” ²⁰ Juu teeb bonchiann din karin sobu maɲa, kimaan siaminba ki bi din kpaa Yiisa dapunpunn paak na din ki fok nan Jerusalem-i. Sobinii na din sob Juu teeb nan Rom teeb nan Griik teeb maan nie.

²¹ Nanne ki Juu teeb mannteeb yudamm saan Pailat boor, ki saa betɔ a, “Li bo ki njan ki a sob a ‘Juu teeb kpanbare na.’ Li bo njan ki a sob a ‘Joɔ na pur u moɲ Juu teeb kpanbare.’ ” ²² Ki Pailat jiin a, “Maa sat sob linba na, n sobe.”

²³ Kunkonkonna na nba kpaa Yiisa na poorpoe, ki bi jii u tiat ki chentir taar munna, ki kunkonkonnɔ kur gaar tor. Li poorpoe biak ki bi jii u tin po liatfoouk, linba ki bi luur bonmun, ki li ki mok nyarmu na, ²⁴ ki yet bi leeb a, “I daa pati. Njaant ki ti to naatɔt ki laan wunba saa

yentir.” Li din teen nna, a Yennu gboun nba din yet linba na n fit gbee-e a:

“Bi chent n tiat,
ki bia tɔ naatɔt n tinj po liatfoouk na paak.”
Nnae ki kunkonkonna na set din tun.

Yiisa nba chabit u naa ki kubinto sɔɔ bianjinba

²⁵ Yiisa naa din see kpia u dapunpunn nae: ki Klopas n̄aapoo nba ki bi yiu Meeri na, ki u tee Yiisa naa maŋ niipoo na, see kpiau, ki Meeri Magdaliinn pukin leŋ. ²⁶ Ki Yiisa la u naa, ki bia la u poorpoweitɔ nba ki u mantik loonɔ na, ki u mun see leŋ, ki Yiisa yet u naa a, “N naa, a bijae na jik,” ²⁷ n̄aan bet u poorpoweitɔ maŋ a, “A mun, a naae na jik.” Laa din nyii li yoo, ki poorpoweitɔ na ji jii Yiisa naa ki kun nanɔ u n̄aak ni.

Yiisa kuun labaar

(Matiu 27.45-56; Mak 15.33-41; Luk 23.44-49)

²⁸ Tɔn, Yiisa din mi nan bonsiar kur nba ki u din tuun na ji gbenna, ki u yet a, “Nyunnyukuru mokin.” U yet nna a lin gbeen linba sɔɔ Yennu gboun ni nae. ²⁹ N̄maŋ din see leŋ nan damiituk, ki bi jii saapo ki tun damiituk maŋ ni, ki jii saapo na ki fin daauk paak, ki teen u mɔb ni, ³⁰ ki u foont ki nak, n̄aan yet a, “Li gbenna,” ki tibin ki chab Yennu u seek.

Bianjinba ki bi jii kpann ki n̄muu Yiisa lokir ni

³¹ Tɔn, laa saa yent ki tee foondaar na, Juu teeb yudamm na din ki loon niib na-ii be dapunpuna paak foondaari, kimaan foondaar nba din saa yent maŋ din tee dajaanne. Li paak, ki bi din saan Pailat boor, a wun chab ki bin konn

konn niib na taa, ki bin kpo yian, ki bin fit kpaatib dapunpuna maŋ paak. ³² Li paak, ki kunkonkonna na saan ki saa konn binba lakin kpaan nan Yiisa na taa, ³³ ŋaan baar Yiisa boor, ki soo ki u kpowa. Li paak bi din ki konn u taa. ³⁴ Ki kunkonkonna na yeno jii kpann ki ŋmuu Yiisa lokir ni. Li taakpaak ni ki son nan nyun nyii.

³⁵ Min nba sobin gbouŋ nae la baa teen bianinba nan n moŋ ninbina, ki teen siara, ki mi nan n siara maŋ tee barmoniie, ki n sobin linba tee barmonii na a yin fit lian teen yada. ³⁶ Li din teen Yiisa nna a lin gbeen linba sob Yennu gbouŋ ni nae a, “Bi kan konn u kpabir nan yenkowa.” ³⁷ Ki Yennu gbouŋ bia yet siar boor a, “Niib tan sii gorii baa ŋmuu wunba kpann na.”

Yiisa gbanant piinu labaar

(Matuu 27.57-61; Mak 15.42-47; Luk 23.50-56)

³⁸ Li poorpoe ki Joosef, wunba tee Arimatea niro na, saan Pailat boor, ki saa miaro Yiisa gbanant. Joosef din tee Yiisa poorpoweitooe, ŋaan u din waau woonin nie, kimaan u tiin Juu teeb yudamme janmaanii. Ki Pailat chabo; ki u saan kpaat Yiisa ki jiiu. ³⁹ Ki Nikodemus, wunba poŋ mi baar Yiisa boor nyiook na mun baar ki dia bonnunubit nba saa teen Yiisa gbanant paak, ki li tee nan borik-gbina piik nan ŋanŋmu na. (Bi din jii bona nba ki bi yir mir nan alos nae ki ŋmat ki teen bonnunubit maŋ.) ⁴⁰ Ki bi jii Yiisa ki pobino chinchennana ni nan bonnunubit na, nan Juu teeb kupiinu kaar nba tee bianinba na. ⁴¹ Baa din kpaan Yiisa siaminba na, kpaab din be

lej, ki kapaaun pon be lej, ki bi din daa ki pii soo kaauk manj ni. ⁴² Juu teeb foondaar nba per na, ki kaauk na boor bia ki fok na, ki bi pii Yiisa lej.

20

Yiisa nba fir kuun ni bianjinba
(*Matiu 28.1-10; Mak 16.1-8; Luk 24.1-12*)

¹ Ki Juu teeb foon daar tan gar, ki lasir daar sanyapob ni ki soo li daa bon, ki Meeri Magdaliinn saan Yiisa kaauk boor, ki la ki bi birint katanu kaauk manj mob paaka; ² ki u chiar saan Simonn Piita nan Yiisa poorpoweiteloo nba ki Yiisa mantik tuu loono na penj, ki betib a, “Bi piit ti Yomdaano kaauk na niwa, ki ti ki mi baa biru siaminba.”

³ Nanne ki Piita nan Yiisa poorpoweiteloo na nyii ki tiin saa, ⁴ ki Yiisa poorpoweiteloo na tin paak Piita, ki saa donj baar kaauk manj boor; ⁵ naan ki koo. U din tibine ki la katinj na. ⁶ Ki Simonn Piita tan yooont baar ki koo, ki la ki katinj na doo, ⁷ ki bia la chichenbik nba ki bi daan fin Yiisa yur na, ki nann fin li bianj ki doo li kuukoo. ⁸ Nanne ki Yiisa poorpoweiteloo nba din donj baar na mun koo ki ji la li bianj, ki teen yada nan Yiisa fir kuun nie. ⁹ Naan bi daa din ki bann linba sob Yennu gbounj ni na paaki, a Yiisa saa fir kuun ni na. ¹⁰ Ki bi nmat kun.

Yiisa nba din dokit Meeri Magdaliinn paak bianjinba
(*Mak 16.9-11*)

11 Meeri ηarin din biar see kaauk maη boor nie ki mo, ki tan tibin ki got kaauk na ni, 12 ki la malakanba banlee lia tapeenii, ki yeno kar siaminba ki bi daan bir Yiisa na yur po, ki loo na mun kar li taa po. 13 Ki bi boio a, "Poo na, bee ki a mo?" Ki u jiin a, "Bi piit n Yomdaano, ki n ki mi baa teeno siami." 14 Waa yet nna, ki u ηmant la ki Yiisa see, ηaan ki u ki bann nan Yiisa-e na. 15 Ki Yiisa boio a, "N niipoo, bee ki a mo? A loon ηmee?" Meeri ηarin din mi a u tee kpaab na toontunnoe. Ki u yeto a, "Li-i tee ki a jiiuie, fan betin faa teeno sian, ki n saan ki saa jiiu." 16 Ki Yiisa yiino a, "Meeri." Ki u ηmant ki tokino, ki yiino Juu teeb maan ni a, "Raboni!" (Li paak tee "Wanntoo.") 17 Ki Yiisa beto a, "Daa somi, kimaan n daa ki doo sanpaapo n Baa boori; ηaan i saa n naa waas boor, ki saa betib a n saa do sanpaapo, wunba tee n Baa nan i Baa na boora; ηooe bia tee n Yennu nan i Yennu na." 18 Ki Meeri Magdaliinn ηmat Yiisa poorpoweiteeb peη ki saa betib a, "N la ti Yomdaano nawa," ηaan yetib waa beto linba.

Yiisa nba dokit u poorpoweiteeb paak bianinba (Matiu 28.16-20; Mak 16.14-18; Luk 24.36-49)

19 Lasir daar maη nyiooko, ki Yiisa poorpoweiteeb na tan lakin leeb ki be diiuk ni, ηaan kpar gann, kimaan bi tiin Juu teeb yudamm na janmaanii, ki tan soo Yiisa see bi sinsuuk ni, ki betib a, "Parmaasir-ii be i paak." 20 Waa yet nna poorpoe, ki u wannib u niipant ni fona nan u lokir ni fonn na. Ki u poorpoweiteeb nba lau maη, ki bi ji mok parpeenn bonchiann. 21 Ki

Yiisa bia namm yetib a, “Parmaasir-ii be i paak. N Baa nba tumin bianjinba na, n mun yaa n tumi li bianje.” ²² Li poorpoe ki u foont bi paak n̄aan yetib a, “Gaat Yennu Seyeen man. ²³ Li-i tee ki i nyik chab soo biiti, u set la nyikin chab u biiti man paaka; n̄aan li-i tee ki i ki nyik chab soo biiti, u kan la nyikin chabi.”

Ki jiin Yiisa nan Tomas po

²⁴ N̄aan u poorpoweiteyen̄o nba tee Tomas, ki bi yiu Jaak na din kaa, yoo nba ki Yiisa baar bi boor na. ²⁵ Ki Yiisa poorpoweiteleeb na beto a, “Ti la ti Yomdaanōwa.” Ki Tomas yetib a, “Min n̄arin, li-i kii tee ki n tan la u niipant ni fona na, ki jii n niibir ki tun siaminba ki bi kpaa kpai na, ki bia jii n nuu ki tun u lokir na ni-i kaa, n kan teen yada.”

²⁶ Li daa n̄anniin daare ki Yiisa poorpoweiteeb na bia lakin leeb ki be diiuk ni, ki Tomas ji be bi ni, ki bi yaan kpar gann; ki Yiisa tan baar see bi ni, ki betib a, “Parmaasir-ii be i paak,” ²⁷ n̄aan bet Tomas a, “Jiin a niibir ki tun n niipant ni, n̄aan bia tant a nuu ki tun n lokir ni, ki ji daa birisi, n̄aan teenin yada.” ²⁸ Ki Tomas yeto a, “Fine tee n Yomdaanō ki bia tee n Yennu.” ²⁹ Ki Yiisa boio a, “Faa ji lan na paake ki a teenin yada-a? Binba ki lan n̄aan teenin yada na, parpeenn tee bi yare.”

Linba paak ki bi sob gbouj nae na

³⁰ Yiisa din tun bakitnaun̄j toonjaana bonchiann u poorpoweiteeb pen̄j, n̄aan li kur ki sob gbouj na ni. ³¹ Linba sob ki be gbouj na ni, bi sob a yin teen yada nan Yiisa-e tee Yennu

Niganntoo Masia, ki bia tee Yennu Bija. Li-i tee ki i teeno yada, u paake ki i saa la manfoor nba kaa gbennu.

21

Bianjinba ki Yiisa dokit u poorpoweiteeb banlore paak

¹ Li poorpoe ki Yiisa namm dokit u poorpoweiteeb paak, mɔkgbenjir nba ki bi yir Taiberias* na ni. Waa dokit bianjinbae na: ² Simonn Piita nan Tomas (wunba ki bi din yiu Jaak na) nan Natanael (nɔɔe din nyii Keena nba be Galilii yent ni na), nan Sebedii waas, nan Yiisa poorpoweiteeb banlee din lakin be Taiberias mɔkgbenjir man ni. ³ Ki Simonn Piita tan bet u leeb na a, “N sik jansooru jen.”

Ki bi beto a, “Timm nan fine saa sik.” Ki bi saan koo burgbetir ni, ki lubin bi janlaaun nyun na ni, naan li nyiok bi din ki soor siari. ⁴ Li din tan yent sanyapob ni ki Yiisa see nyunkpin, naan ki u poorpoweiteeb ki mi a nɔɔe. ⁵ Ki u boib a, “Naajab, i ki soor siari-i?”

Ki bi jiin a, “Nn.”

⁶ Ki u betib a, “Lumin i janlaaun i diitu po, ki i saa soor janii.” Ki bi lu janlaaun na, ki ji gbar donnu, kimaan janii nba ki bi soor na kpiatu din paaka.

⁷ Nanne ki Yiisa poorpoweitoo nba ki u mantik loono na yet Piita a, “Ti Yomdaano.” Simonn Piita nba gbat a bi Yomdaano na, ki u lia u liatir

* **21:1** 21.1 Galilii mɔkgbenjir sanleere tee Taiberias-e.

nba ki u bo liat bir na, ki yukir sik nyun ni ki baar Yiisa boor. ⁸ Leŋ din ki fɔk nan nyunkpinji; li fɔkint din tee nan taapaun kobii ŋantaa nae; ki Yiisa poorpoweiteleb ji kan burgbetir na ki li daar janlaaun na, ki li gbee nan janii, ki baar nann nyunkpinj.

⁹ Baa nyii burgbetir na ni yoo nba, ki bi la boroboro nan sankɔɔna muu, ki jan paa muu na paak ki beet. ¹⁰ Ki Yiisa betib a, “Jiin janii nba ki i soor na waan, ki baar nann nna.” ¹¹ Ki Simonn Piita kɔɔ burgbetir na ni, ki dat janlaaun na ki donn kunkonn, ki li gbee nan jangbenja; ki bi kan, ki li tee janii kobik nan piinŋmu nan ŋantaa. Li din yab bonchiann, ŋaan janlaaun na lek ki pati.

¹² Ŋanne ki Yiisa betib a, “Saana man ki tan ŋman.” Ŋaan nan bi yenɔkɔɔwa lek ki mɔk parcheenn nan wun boio a u tee ŋmee, kimaan bi mi nan u tee Yomdaano nae. ¹³ Ki Yiisa jii boroboro na ki turib, ki bia jii jan na ki turib.

¹⁴ Linba nae din tee taar muntaa ni ki Yiisa jii u moŋ ki wann u poorpoweiteeb, Yennu nba din fiino kuun ni na poorpo.

Bianjinba ki Yiisa pak nan Piita

¹⁵ Baa din dii jeet maŋ poorpoe, ki Yiisa boi Simonn Piita a, “Simonn, fin Jɔɔnn bija, a loonin ki gar linba nawa-a?”

Ki u jiin a, “Nn, n Yomdaano, a mi nan n loona.”

Ki u yeto a, “Ii dint n pebis.” ¹⁶ Ki Yiisa bia boi Simonn Piita taar munlee ni a, “Simonn, Jɔɔnn bija, a loonimi-i?”

Ki u jiin a, “Nn, n Yomdaano, a mi nan n loona.”

Ki u beto a, “Ii kpaar n pei.” ¹⁷ Ki taar muntaa ni ki Yiisa boio a, “Simonn, fin Joonn bija, a loonimi-i?”

Ki Piita par ji biir, kimaan Yiisa nba boio taar muntaa a, “A loonimi-i?” na. Ki u yeto a, “N Yomdaano, a mi bonsiar kur. A mi nan n loona.”

Ki Yiisa beto a, “Ii dint n pei. ¹⁸ Barmoniie ki n beera na, faa din tee naasimo na, a din tuu bob a gbanne, ki saa siaminba ki a loon; njaan a-i tanj kpet yoo nba, a saa tant a nii, ki soo saa lora, ki mukisa ki saan nana siaminba ki a ki loon.” ¹⁹ Yiisa nba yet linba na din want bianjinba ki Piita tan saa kpo ki te Yennu sann n la dontire. Li poorpo ki Yiisa yeto a, “Ii waa-n.”

²⁰ Ki Piita tan jiant ki la Yiisa poorpoweitelo nba ki u mantik loono na ki u waa; njo manje din kar ki kpia Yiisa, yoo nba ki bi lakin di jeet, ki donn boio a, “Nmee yaa wun nyi a poori?” na. ²¹ Piita nba lau yoo nba, ki u boi Yiisa a, “N Yomdaano, njaan joo na narimi-i?” ²² Ki Yiisa yeto a, “Mi-i loon ki wuu be nan maa tan saa jen, li ki la-ani. Fin-ii waan.”

²³ Li paake teen ki Yiisa poorpoweiteeb na din yeen a Yiisa poorpoweitoo man kan kpo. Njaan Yiisa din ki pak a u kan kpo kaa. U din yet a, “Mi-i loon wuu be nan maa tan saa jen, li ki la-ani.”

Ki jiin wunba sob gbouj na po

²⁴ Ton, Yiisa poorpoweitoo manje tee wunba yeen niib barii man, ki bia sobir gbouj na ni; ki ti mi nan waa yeen linba na tee barmoniie.

25 Naan bona bonchiann be ki Yiisa din tun ki pukin linba sob gbouŋ na ni paak. Bi-i bonni sob linba kur ki u din tun maŋ, n dukin nan gbant nba ki bi bo saa sob na bo kan la yiar tingbouŋ na ni kii be.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

00d89ba0-4677-52d9-9bc5-aa3d7c5c966d